

# IPURU

## IPURU Yamboma Pepá Topa Sirimu Bokumu

*I Bokumunge Ungu Pulu Mare*

*Isirele yambomanga anda kolepa Jekopo, yunge imbi te 'Isirele' niringi, akumuni yandopa Yesusi molopili kalopa lirimu yambomando 'Isirele yamboma' niringi; 'Juda yamboma' niringila; 'Ipuru yamboma' niringila. Ou pulu pulu 'Ipuru yamboma' niringi ungumu Wendo Oringi 1:22 molemo. Nakolo i pepá topa sirimu Ipuru yambo akuma Juda yambo konopu alowa teko 'Yesusi yu sike Pulu Yemonga Malo. Yu sike Pulu Yemone "Ene nokopa konjimbe ye te lipu mundumbu." ou nimbe, nimbe panjipe mako torumu ye nomi Kirasimu.' ningu tondolo munduku piliringi yamboma.*

*Kanu Ipuru yamboma ou Mosisini sirimu ungu manema pilku liku Pulu Yemo popo tongendo kongime toko kalko kongimenga memema Pulu Yemo siringi yamboma moloringine pilipelie pepámo torumu yambomone kanu Ipuru yamboma Kirasinge unguma mane simbendo "Mosisi kinie, kongi toko Pulu Yemo siringi kongime kinie kongimenga memema kinie, Pulu Yemo popo toringi ulke tembelemo kinie, Pulu Yemo popo tonjili yema kinie kanu yemanga ye aili olandopamo kinie, kanuma paa manie." nimbe, "Yesusi kinie Yesusinge mememo kinie Yesusi yuyu kepe paa olandopa." nirimu. 'Yu munduku kelko ou pilku*

*teko moloringi mele kelko naa teangi.’ nimbe i pepámo topa sirimu.*

*Ungu pulu mare boku alsena anjukundu molemo akuma i sipe: “32.2. Pikinini Bilong God”, “26. lo”, “34. pris”, “34.3. hetpris”.*

*I pepámo topa sirimu yemo naenje, naa pilimolo. Marene ‘Pollone torumu’ konopu lemele. Nakolo Matini LLuta kinie yambo marene ‘Pollo molo. Ye tene lupe torumu.’ niringi. Yambo marene Lipe Mundurumu Yema 18:24-28 kanokolie ‘Aku ye Apollosini torumu.’ konopu lemele. Marene aku temanemo kanokolie ningindu: “Ambo Pirisillane torumunje.” nilimele. Koronga ou ye pilipe konginjili ye tene “Banapasini torumunje.” nirimu. Lipe Mundurumu Yema 4:36, 13:1-4 kanopalie aku sipe pilirimunje. “Molo, LLukuni torumunje. Molo ye tene lupe torumunje.” nilimele. Nakolo i pepá torumu yambomonga imbimu unguri molo. Pulu Yemonga Mini Kake Telimuni ‘Pulu Yemonga ungumu tonjipili.’ nirimu kinie pilipelie yambo tene torumu, akumunge i bokune molemo ungumu sike Pulu Yemonga ungumu.*

*Ya ungu pulumu pora nikimu.*

<sup>1</sup> Paa ou Pulu Yemone alieli olio Ipuru yambomonga anda kolepalimendo ‘Nanga unguma piliengi!’ nimbe yunge ungumu pilku yando ningu siringi yema\* yuni ungu umbu tonjirimuma pilkulie olionga anda kolepalime ningu siringi. ‘Yamboma paa piliengi!’ nimbe lipe taponjirimu kinie kanu yemane ulu aisili liku ora siku teko ungu aisili ningu siringi.

<sup>2</sup> Nakolo pe kinié\* ‘Yunge Malone olio yunge unguma nimbe sinjipili.’ nimbe Pulu Yemone\*\* yu mana maniendo lipe mundurumu. Kanu kangomo Pulu Yemone ‘Nanga melema kamu yu simbu, lipe nosipe molomba.’ nirimu kangomo. Kanu kangomo yu Pulu Yemone ou mulu ma melema “Teambo.” nirimu melema pali terimu yemola.\*\*\*

<sup>3</sup> ɿEnamo pa telemo mele aku sipe, Malo pa telemo akumuni Pulu Yemonga pa tondolo mundupe telemo pa telimu olio lipe ora silimo.\* Pulu Yemo molemo mele Malo aku sipe molemo. Malonga ungu tondolomone melema pali kapola molemele. Yuni ‘olionga ulu pulu kerime omba manie pupili, olio yambo kalaro naa mololime molangi.’ nimbe kongono tepa pora sipelie ɿmelema pali nokombando, mulu koleana Ye Nomi Kingi Aili Olandopamonga ki umbukundu pupu molemo.\*\*

<sup>4</sup> Aku terimuna\* yunge imbi lepa ‘Nanga Malo’ nirimu aku imbimu paa olandopa purumu, mulu koleana angellomando imbi lepa ‘Pulu Yemonga kongono tenjili yema’ nirimu aku imbimu paa manie, aku sipe mele yu yuyu paa olandopa angelloma maniendopa.

<sup>5</sup> Pulu Yemone nimbendo:  
 “Nu nanga Malo. Kinié na nunge Lanie.”.\*  
 nirimu mele angello tendo walse aku sipe nirimuye? ɿMolo. Yunge Malondo mindi aku sipe nirimu.ɿ  
 Molo yuni nimbendo:  
 “Na yunge Lapa molombo,  
 yu nanga Malo molomba.”.\*\*

nirimu akumu angello tendo nirimuye? „Molola. Malondo mindi aku sipe nirimu.”

<sup>6</sup> Yundu ungu te pea nirimula. Yunge kango komolayemo\* mana lipe maniendo mundupelie Pulu Yemone yunge angellomando nimbendo:

“Kangomo popo toko kapi ningu yunge imbi ambolko ola linjei.”\*\*

nirimu. Aku unguma pilipulie ‘Malo olandopa angelloma maniendopa.’ nimbu pilimolo.

<sup>7</sup> Angellomando Pulu Yemone nimbendo:

“Yunge angelloma poporomema mele molko, yunge kongono tenjili yema tepe mele molangi.”\*

nilimo.

<sup>8</sup> Nakolo Pulu Yemone Malondo nimbendo:

“Pulu Yemo, nu alieli ye nomi kingimu moleno mele molko mindi puni.\*

Nuni ulu sumbi nilime teko yamboma nokoni.

<sup>9</sup> Nuni ulu pulu sumbi nilime manjiku

konopu siku teleno.

Ulu pulu kerime konopu naa monjiku

paa naa teleno, akumunge

nunge Pulu Yemone ‘Nu ye nomi kingi molko

melema pali nokani.’ nimbe mako topalie

nunge pulu lemo yambomanga pali

namba paa olandopamo nu sirimu.

Nu aku sipe tepa konjirimumunge

nu kinie nunge pulu lemo yamboma kinie

konopu singi.”

nirimu.\*

<sup>10</sup> Pulu Yemone „Malondo, ungu te pea nimbendo:

“Ailimu,\* ou pulu pulu nuni mamu teko,

nunge kimuni nunu mulumu teko mimi terinu.

<sup>11</sup> Aku meletolo pora nimbé, nakolo  
nu alieli molko mindi pulino.

Mulu wambalema pingi pupe  
sungu nimbe keru lemo mele  
mulu matolo aku temba.

<sup>12</sup> Yambomane wale pakoli suluma  
toko ele tengendo kimbulimele mele  
nuni mulu matolo aku siku kimbuni;  
mulu wambale te lupe panjingindu alowa  
telemele mele

nuni aku siku aku meletolo alowa teni.

Nakolo nu nunu aku siku alowa naa teko,  
moleno mele alieli molko,\*

anda naa lelko, alieli molko mindi puni.”.\*\*  
nirimu.

<sup>13</sup> Pulu Yemone ou walse nimbendo:

“ ‘Nunge opa tuma nuni nokani.’ nimbu  
pe ene topo manie mundunjimbu kene  
isili ou nu ,na kinie pea

tapu topolo ye nomitolo molopolo

melema nokambili,

nanga ki umbukundu ongo molani.”.\*

nirimu aku ungumu angellomando nirimuye?

<sup>14</sup> ,Aku ungumu angellomando naa nirimu  
liemo, angelloma nameleye? Angelloma mini  
mele molko Pulu Yemonga kongono tenjili yema.  
Kanuma Pulu Yemone lipe taponjipe, mindili  
nolemelka aulkena wendo lipe, yu kinie pea  
molko konjingí aulkena lipe monjilimo\* ulu  
pulumu lingí yamboma ‘Liku taponjiku nokangi  
pai.’ nimbe lipe mundulimo yema.

## 2

<sup>1</sup> ƁKapola, Malo sike angellomanga olandopa molemo, akumunge, ƁPulu Yemone olio kinie ulu peangama temba mele Yesusini nimbe sirimu, ungu sike ou pilirimuluma siye kolopo naa pilipulie kamu mundupu kelemolo kene aku ungumu konopu kimbu sipu ambolopo molamili.

<sup>2-3</sup> ƁPulu Yemone ou olionga anda kolepalime kinie ungu nimbe panjipe mi lerimu ungumuni ene nokorumu kinie, Pulu Yemone olionga anda kolepalime Ɓungu mane ‘Mosisini sipili.’ nimbe, ‘angellomane ƁMosisi ningu siei.’ nirimu kinie,\* yunge ungu mane niringi aku ungu manema tondolo pupe perimu. Kanu ungu manema naa pilku pulue toringi yamboma teko kenjiringimunge mele kalolime liringi. Kinié Pulu Yemone olio lipe taponjipe, ‘Mindili nolemelka ulkena wendo ongo na kinie pea molko konjingí aulkena pangi.’ nilimo ulu akumu\*\* paa olandopamo. Pe angellomane ou ningu siringi unguma pulue toringi kinie mongo liringi liemo Pulu Yemone olio kinié lipe taponjimbendo taponjilimo ulu Aili\*\*\* ƁYesusi, yuni yuyu ou kumbi lepa nimbe sirimu aku ulu paa olandopamo mundupu kelemulu liemo pe olio ulu pulu keru telemolomanga nambe tepo kowa pupu mindili naa nomoloye? ƁKinié Pulu Yemone olio kinie ungu konde te nimbe panjipe mi lerimumu pelemo walemanga, Pulu Yemone olio lipe taponjili kongonomo paa olandopa akumunge olio manda kowa paa naa pumulú.

Pulu Yemone olio lipe taponjimbe mele ungu akumu ou kumbi lepa Aili ƁYesusi, yuni yuyu

nimbe sirimu kinie pe aku ungu nirimumu piliringi yemane yando oliondo ningindu: “I ungunu paa sike.” niringi.

<sup>4</sup> Aku siku ningu molangi Pulu Yemone kepe ‘ ‘Malonga ungunu paa sike.’ ningu piliengi!’ nimbe kanu yema lipe taponjipe tondoloma sirimu kinie enene lipe ora sirimu ulu tondoloma teringi.\* Pulu Yemone Mini Kake Telimunge tondolomo lipe yuyu konopuni pilipelie kongono molo ulu lupe lupema tenge tondoloma ungu ningu siringi yamboma moke tepa sirimu.\*\* ‘Pe kanu ungu kondemo ‘Paa piliengi!’ nimbe Pulu Yemone yuyu kanu ungu kondemo lipe taponjir- imu liemo kanu ungunu pilku likulie munduku kelenge yamboma mongo naa lingíye?,

<sup>5</sup> Ma konde te wendo ombámondo nikumulu aku mamu Pulu Yemone ‘nokangi.’ nirimu akumu angellomando naa nirimu.

<sup>6</sup> Aku molo. Pulu Yemonga bokuna ‘yambomane ma pe wendo ombámo nokongema,’ ungu te nimbe sipelie nimbendo:

“‘Pulu Yemo,’

nuni olio yamboma nambolka melema

konopu lelkolie

olio kanoko imbi silinoye?

Mana yambomane melemele yamboma

nambemuna nuni kondo kolko nokolenoye?\*

<sup>7</sup> ‘Nuni yambomando ninindu:’

“ ‘Yamboma angellomanga laye kolo

maniendopa\* molangi.’ nimbú.” nirinu.

‘Pe,’ nuni enenga imbime ambolko ola linjiku,

nambama siku,

<sup>8</sup> ‘enene melema pali nokangi.’ nirinu.”.\*

nimbe molemo. Pulu Yemone ‘Mana yambomane melema pali nokangi.’ nirimu bokuna molemo liemo Pulu Yemone mele terimumanga teluri kepe ‘Enene naa nokangi.’ nirimu melte paa naa lemo.

Nakolo ı ‘yambomane melema pali nokonge’ nilimo nimbe molemo mele kinié aku sipu nimbu naa kanolemolo.ı Kinié ‘yambomane melemanga mare naa nokolemele.’ nimbu kanolemolo.\*\*

<sup>9</sup> ‘Aku sike nakolo kinié ımana ye telu sikeı yunge imbi kinie nambatolo melemanga pali paa olandopa molkomo.’ nimbu kanolemolo.\* Akumu Yesusi. Ou Pulu Yemone olio we kondo kolopa ‘yu yamboma lipe taponjipe enenga pali kolo wangopa mindili nomba kolonjipili.’ nimbe ‘yu angellomanga manie mele molopili.’ nirimu. Yu mindili nomba kolumumunge Pulu Yemone yu melemanga pali namba olandopa sipe yunge imbi ambolopa ola linjirimu nimbu kanolemolo.

<sup>10</sup> Akumunge ungu te pea niembo: Pulu Yemone melema pali terimu, yu melemanga pali Pulu Yemo. Yuni yuyu pilipelie melema terimu, akuma kinié nokolemo akumunge yuni yambo aisili mako topa ‘Nanga ambolangoma molko,\* na kinie pea tapu topo molamili.’ nirimu kinie ene lipe taponjipe, mindili nolemelka aulkena wendo lipe, yu kinie molko konjingı aulkena lipe monjirimu yemo ‘mindili nopili.’ nirimu akumu papu nirimu. Yu mindili norumumunge yu ye paa peanga sumbi nilimu molopa ene lipe taponjipe mulu koleana pungı aulkemo lipe ora simbendo memba pulimo.



11 ɿYuni Pulu Yemonga ambolango aisili manda mulu koleana memba pulimomonga pulumu i sipe:ɿ Yu kinie ene kinie yambo talape telumu. Ye tene yamboma lipe taponjipe ‘Pulu Yemone kanopa ‘yunge yambo kake telime’ nimbe kanopili.’\* nilimo yemo kinie kanu yemone yamboma lipe taponjilimona ene Pulu Yemone kanopa ‘nanga yambo kake telime’ nimbe kanolemo yamboma kinie olionga Lapa telumu. Akumunge yuni enendo “Ano” nimbendo pipili naa kolemo.\*\*

12 Akumunge ou ungu te nimbendo:  
 “ɿPulu Yemo,ɿ nu moleno mele nanga angenupilindu nimbu simbu. Ene kinie pea nu popo tomolondo maku topo molomolo kinie ene pilku molangi konana nimbu nu kapi nimbú.”\* nirimu.

13 Akumunge kelepa walse yuni ungu te nimbendo:  
 “ɿNanga angenupilimene telemele mele, nane ɿaku sipu,ɿ Pulu Yemone “Na nokombo.” nirimu mele ‘Sike temba.’ nimbu pilipu taka lepo molombo.”\* nirimula.

Akumunge ungu te pea nimbendo:  
 “Pulu Yemone na ambolango sirimuma kinie pea molemolo.”\*\* nirimula.

14 Ambolangomando ɿ‘Nanga angenupilime’,ɿ nirimu akumu mana yambomando nirimu, akumunge Yesusi yu ‘ene mele molambo.’ nimbe mana ye au lepa molorumu. ‘Enenga nimbu kolonjipulie kololi ulu pulumu nokolemo yemo

topo manie mundembo.’ nimbe\* aku sipe mana ye au lepalie kolorumu. Kololi ulu pulumu nokolemo ye\*\* akumu depelemo.\*\*\*

15 ‘Kolongendo alieli konopu kimbu siku pipili kolko mindi molemele yamboma aku siku molemele aulkena wendo liembo.’ nimbe Yesusi kolorumu. ‘Kurumanga nomi Setenene, ‘Ene pipili kolangi’ nilimo akumu ka ulkena mele panjilimo.

16 ‘Yesusini aku sipe terimu akumu angelloma lipe taponjimbendo paa naa terimu.’ nimbu kanolemolo; ‘Eporayamone kalopa lirimu yamboma lipe taponjimbendo paa sike terimu.’ nimbu kanolemolo.

17 Akumunge yunge angenupilime mana molemele mele yu aku sipe mana molopa ene umbuni telemo molo mindili nolemele aku sipe uluma pali yu kinie telu sipe wendo naa olkanje kapola molo. Yu yambomanga kondo kolopa Pulu Yemo popo tonjili ye aili olandopamo\* molopa Pulu Yemonga kumbikerena aku kongonomo tondolo mundupe ambolopa molomba aulke te lupe naa perimu. Yu Pulu Yemone ‘yambomanga ulu pulu kerime omba manie pupili.’ nimbé, yu kinie kapola kapola molonge kongonomo tembando aku sipe mana ye te mindi omba molorumumunge kinié aku kongonomo kapola tepa molemo. Wenje kapola naa tepa molka.\*\*

18 Yu kinie kondi topa manda manjili ulu aisili wendo omba, mindili norumu\* akumunge yamboma kinie kondi topa manda manjili uluma wendo olemo kinie yuni manda ene lipe tapon-

jilimo.

### 3

<sup>1</sup> Angokeme, na kinie pea Kirasinge yambo molemelema, mulu koleana molemo Pulu Yemone ene kepe mako topa 'Nanga yamboma molangi.' nilimo yamboma, aku nikiru ungumu ungu sikemo kene Yesusi molemo mele paa konopu kimbu siku molangi. Yu Pulu Yemone "Nanga kongonomo tenjipui." nimbe lippe mundurumu yemo, akumu Pulu Yemo Popo Tonjili Ye Aili Olandopamola,\* aku yemo 'Sike' nimbu yu molemo mele yamboma temane topo silimolo akumu mimi siku piliengi!

<sup>2</sup> Ou Mosisini Pulu Yemonga yamboma nokopalie Pulu Yemone "Tei." nirimu mele pilipe sumbi sipe tewa ungu te siye naa kolorumu aku sipela Pulu Yemone Yesusi mako topa kongono sipe "Tei." nirimu mele pilipe lippe tenge panjipe terimu. ıPulu Yemonga yamboma yunge ulkemo mele.ı\*

<sup>3</sup> Ye tene ulke takolemo aku ıulke pulu, yemo yunge imbi olandopa molemo, yu paa kapi nilimele, ulkemo yunge imbi olandopa naa molemo, aku sipe mele i ye Yesusi ıPulu Yemo kinie pea ulkemo takoringilimunge, yunge imbimu 'Paa ola molopili.' ningu yu olandopa kapi ningu, ye nomi Mosisi ıulkemonga ponga molo simu mele angilirimumunge, yu manie mele kapi níngi liemo papu.

<sup>4</sup> Ulke te we wendo naa omba angilimo. Yambo tene ulke te takolemo kinie angilimo. Nakolo

Pulu Yemone melema pali ‘angilipili’ nirimuna angilimo.\*

<sup>5</sup> ı Yesusi kinie Mosisi kinie lupe lupetolo mele, ungu te pea ı i sipela:, Mosisi yu Pulu Yemonga kongono tenjili yemo molopa Pulu Yemone “Tei.” nirimu mele paa pilipe lipe Pulu Yemo yunge ulkena kongono tembando siye naa kolopa kongono tepa mindi molorumu. Yunge kongono terimu i sipe: Pulu Yemone pe nimbe simbe mele Mosisini ou nimbe sirimu.\*

<sup>6</sup> ı Mosisi ulkena kongono kendemande tenjili yemo molorumu, nakolo Pulu Yemone pe lipe mundurumu ye nomi Kirasimu yu Pulu Yemonga Malo\* molopa yamboma Pulu Yemonga ulkemo moloringime yuni nokopa Pulu Yemone “Tei.” nirimu mele paa pilipe lipe kongono tembando siye naa kolopa kongono tepa mindi molorumu. ‘Yesusini olio lipe taponjimbe.’ nimbu tondolo mundupu pilirimulu mele mundupu naa kelepo, konopu tondolo pupili ‘Sike aku temba.’ nimbu tondolo mundupu pilipu pipili naa kolopo konopu sipu nokopo molomulu liemo olio yunge ulkemo molemolo. ı Olio kepe Pulu Yemonga yamboma molemolo.ı

<sup>7</sup> Pe kinié ı olio Pulu Yemonga yamboma molemolo, monga Mini Kake Telimuni nilimo mele piliemili. Yuni nimbendo:

“Pulu Yemone kinié nikimu ungumu  
kinié pilíngi liemo

<sup>8-9</sup> ou enenga anda kolepalimene

kolea ku leline ‘Pulu Yemone  
mumindili kolombanje?’ ningu kara puku  
ungu nirinduma ‘Paa naa pilimulú.’ ningu

ta niringi mele naa teayo.

Akuna ponie tu paono omba pupili ene kanoko  
molangi

nane , 'Ene lipu taponjembo' nimbu,  
ulu tondolo mare terindu nakolo kanokolie  
'Pulu Yemone olio uluri naa tembanje,  
kanopo kanamili.' ningu  
nanga ungumu naa pilku ta ningu,  
'na ene nokambo.' naa niringi.\*

<sup>10</sup> Akumunge nane kanu yamboma kinie  
paa mumindili kolopolie nimbundu:

"I yamboma nane ungu nilioma naa pilku  
ta ningu enenga aulke mako tonjirinduna  
naa puku munduku kelemele." nirindu.

<sup>11</sup> Ene kinie mumindili kolopolie  
mi lepo nimbundu:

'Nane 'Konopu taka lepa pepili molangi.'  
nirindu ulu pulumu  
ene paa naa lingi.' nirindu."\*  
nirimu.

<sup>12</sup> Nanga angokeme, ene yambo molemele-  
manga tene ,ou olionga anda kolepalimene aku  
teringi mele, temba kene kanoko konjiku molai.  
Enenga yambo tene 'Ulu pulu kerime teambo.'  
nimbe konopu lipe mundupe yu ,Pulu Yemone  
nirimu mele 'Sike.' nimbe, tondolo mundupe  
pilimo mele mundupe kelepalie yamboma ton-  
dolo mundupe nokolemo tondolomo pelemo  
Pulu Yemo bulu simbe kene kanoko konjiku  
molai.

<sup>13</sup> Aku naa tekolie ,i siku teangi:, 'Ulu pulu  
kerimene olio kondi topa 'Kara pangi.' nimbé  
kene' ningu 'yamboma anju yando konopuma

tondolo pupili.’ ningu liku taponjengi. Pulu Yemone “Kinié” nirimu inie olakondo tondu akumu\* olione alieli “Kinié\*\* uluma manda temolo. Kinié\*\* manda tondolo mundupu pilimolo.” nilimolo aku walemanga aku sipu nimbu pilipu anju yando yamboma ungu peangama nimbu siemili. ,Opali talu nambolka uluri wendo ombánje kene kinié mindi aku teamili.,

14 ,Aku nikirumunge pulumu, i sipe: Olio ‘Pulu Yemone sike lipe taponjimbe.’ nimbu pilirimulu mele aku sipu kamu paa tondolo mundupu pilipu ambolopolie kolomulu liemo Pulu Yemone melema Kirasi simbe kinie Kirasini ‘Yunge yamboma simbu.’ nimbe panjirimu melema olio moke tepa simbela akumunge ‘aku siku teangi.’ nikiru.

15 Aku mele inie olakondo tondu mele ,paa konopu kimbu siku molangi., Akumu i sipe: “Pulu Yemone kinié nikimu ungumu kinié pilíngi liemo ou enenga anda kolepalimene kara puku ungu nirinduma ‘Paa naa pilimulú.’ ningu ta niringi mele naa teai.” nirimu kanumu.\*

16 Namelene ou Pulu Yemone ungu nirimuma pilkulie ‘Naa pilimulú.’ ningu kara puringiye? Akumu Mosisini Isipi mundupe kelepa memba ulsu purumu aku yambomane aku siku naa teringiye?

17 Ponie tu paono omba pupili Pulu Yemone namele kinie mumindili kolopa molorumuye? Ulu pulu keru tekolie kolea ku leline koloringi onoma akuna lepili siye koloringi\* yamboma

kinie ɔulu pulu kerɔ teringimunge, mumindili  
kolorumu kanumu.\*\*

<sup>18</sup> “Na Pulu Yemone

‘ ‘Konopu taka lepa pepili molangi.’

nirindu ulu pulumu

ene paa naa lingí.’ nirindu.”.\*

nirimu akumu namelendo nirimuye? Akumu  
yunge ungu ‘naa pilimulú.’ ningu ta niringi  
yambomando naa nirimuye?

<sup>19</sup> Akumu pilipulie ‘Pulu Yemonga ungumu ‘  
‘Sike nikimu.’ nimbu tondolo mundupu naa  
pilimulú.’ ningu moloringimunge Pulu Yemone  
“Konopu taka lepa pepili molangi.” nilke  
koleana ou akuna pungí aulke te paa naa lerimu.’  
nimbu pilimolo kanumu.

## 4

<sup>1</sup> Akumunge, Pulu Yemone ɔolionga anda  
kolepalimendo ‘ ‘Konopu taka lepa pepili  
molangi.’ nimbú koleana membo pambo.’  
ou nimbe panjirimu ungumu, kinié kepe we  
pelemo kene yuni enenga yambo te apurupe  
kanopalie “ ‘Konopu taka lepa pepili molangi.’  
nirindu ulu pulumu naa lipili.” nimbé kene pipili  
kolko molangi.

<sup>2</sup> Nambemuna ɔaku nimbu pipili kolamiliye?,  
Ou olionga anda kolepali ɔMosisini kolea Isipi  
mundupe kelepa memba ulsu purumu, kanu  
yamboma temane peangamo piliringi, kinié olio  
temane peangamo pilimolola. Nakolo kanu anda  
kolepalime aku ungumu pilkulie ‘Pulu Yemone  
sike nikimu.’ ningu tondolo munduku naa  
piliringimunge ungu piliringimuni ene lipe naa

taponjirimu, akumunge ı ‘Kinié olio kinie ulu aku sipe wendo ombá.’, ningu pipili kolko molangi.

<sup>3</sup> Olio Pulu Yemonga ‘Tembo’ nilimo mele ‘Sike temba.’ nimbu tondolo mundupu pilirimulu\* yamboma ımindı, kinié sike Pulu Yemone ‘Konopu taka lepa pepili molangi.’ nimbú.’ nirimu ulu pulumu manda limulú. Ou Pulu Yemone nirimu mele aku sipe pelemola. Ou yuni nimbendo:

“Ene kinie mumindili kolopolie mi lepo nimbundu:

Nane ‘Konopu taka lepa pepili\*\* molangi.’

nirindu ulu pulumu ene paa naa lingı.”\*\*\*

nirimu. I ulumu ou Mosisi naa molopili we perimu. Ou Pulu Yemone mulu ma melema terimu aku kongonomo tepa pora sirimu kinie aku koro mololi\*\* ulu pulumu perimu.

<sup>4</sup> Pulu Yemonga bokuna ungu te molemo mele pilipelie ı ‘Konopu taka lepa pepili mololi ulu pulumu Mosisi naa molopili ou perimu.’ nimbu pilimolo.ı Bokuna molemo ungu akumuni wale yepoko pakara sipemondo nimbendo:

‘Wale te pakara talo pakara

Pulu Yemone kongonoma tepa pora sipelie

wale yepoko pakara sipemonga mulu pilipe koro molorumu.’.\*

nimbe molemo.

<sup>5</sup> ıKoro molorumumunge, ungu te pea nirimu akumu inie olakondo molemola.\* Akumu i sipe:

“Nane ‘Konopu taka lepa pepili molangi.’

nirindu ulu pulumu ene paa naa lingı.”

nimbe molemo.



<sup>6</sup> Aku ungumuni olio lipe ora silimo mele i sipe: Pulu Yemonga konopu taka lepa pepili mololi ulu pulu ou perimu akumu\* kinié we pelemo akumunge kinié yambo mare aku konopu taka lepa pepili molonge ulu pulumu limele. Sike Mosisini memba purumu anda kolepalime temane peangamo pilkulie kara puku ungumu naa pilku likulie koro naa moloringi, nakolo kinié yambo mare manda konopu taka lepa pepili molemele,.

<sup>7</sup> Ou ene konopu taka lepa pepili koro naa moloringimunge ponie aisili omba pupili pe walse Pulu Yemone altopa, ye nomi kingi, Depisinge kerena altopa “Kinié” nirimu. Depisini ou nirimu nindu kanumu i sipe:

“Pulu Yemone kinié nikimu ungumu kinié pilíngi liemo

kara puku ‘Paa naa pilimulú.’ naa niengi.”\*

nirimu kanumu. “Kinié.” nirimu akumunge pulumu i sipe: Pulu Yemone altopa wale te mako topalie ‘I walemo konopu taka lepa pepili molonge walemo.’ nimbe nirimu.

<sup>8</sup> Mosisi kolumu kinie, Josua yu kolo wangopa olionga anda kolepalime nokorumu yemo, yuni koro molonge ulu pulumu ene sirimu kinie\* Pulu Yemone ou enendo “‘Koro molangi.’ nimbú.” nimbe panjirimu\*\* mele kamu pora nilkenje Pulu Yemone pe altopa, ‘Koro molangi.’ nimbé, wale tendo naa nilke.\*\*\*

<sup>9</sup> Akumunge,\* Pulu Yemone yunge yambo-mando ‘Konopu taka lepa pepili molangi.’ nilimo ulu pulumu kinié kepe we pelemo. Aku koro mololi ulu pulumu Pulu Yemone mulu matolo kinie melema tepa pora sipelie wale yepoko

pakara sipemonga Sambate walena mulu pilipe koro molorumu aku sipe mele pelemo.

<sup>10</sup> „Aku nikirumunge pulumu i sipe:„ Pulu Yemone ‘Konopu taka lepa pepili molangi.’ nilimo ulu pulumu limele yamboma Pulu Yemone yuyu kongonoma tepa pora sipelie kamu koro molorumu mele aku siku ene yu mele mele Pulu Yemone “Teai.” nilimo kongonomo teko pora sikulie walemanga pali konopu taka lepa pepili molemele.\*

<sup>11</sup> Akumunge, Pulu Yemone ‘ ‘Konopu taka lepa pepili molangi.’ nimbú.’ nimbe panjirimu ulu pulumu ‘Lipulie konopu taka lepa pepili molamili.’ ningulie konopu taka lepa pepili molongel uluma mindi tondolo munduku teko siye naa kolayo. Ou anda kolepalime ungu naa pilku kara pukulie ‘Konopu taka lepa pepili molangi.’ nirimu mele koro naa moloringi mele olio aku sipu olionga anda kolepalimene teringi mele naa teamili. Ou aku tekolie molko kenjiringi mele kinié olio Kirasinge yambomanga yambo te aku sipe tepalie molopa kenjimbe kinie kapola naa temba.

<sup>12</sup> „Nirimu mele sike aku sipe wendo orumu pilipulie, ‘Pulu Yemone nirimu ungumu we naa molemo. Yunge ungumu konde molopa uluma tepa\* enge nilimo.’ nimbu pilimolo. Kanu ungumu nee paa molemo, opa teli lou pulse ekendo ekendo nee molemo aku maniendopa, yu paa olandopa. Opa teli lou pulsemone ombelemo kinie kikimemo kinie sumbi sipe topa suru tolemo mele Pulu Yemonga ungumuni aku sipe minimu kinie konopumu kinie topa suru

tolemo, akumunge olio konopu kimbu silimolo mele kinie, konopuni pilipu 'Temolo.' konopu lemolo mele kinie, pali pilipe apurulimo.

<sup>13</sup> Pulu Yemone mele terimumanga pali te 'Pulu Yemone naa kanopili.' ningu manda lopi naa tenge. Yambo te mulu wambalema naa panjipe we we angilimo mele yunge kangine melema mona angilimo manda sumbi sipu kanolemolo mele aku sipe melema pali Pulu Yemonga kumbikerena mona lemo, aku Pulu Yemone olio ulu telemoloma pali pilipe apurumbe.\*

<sup>14</sup> Kapola, 1ou ungu te nindu\* akumu kinié kamu niembo:, Olionga mulu koleana Pulu Yemo molemona purumu Pulu Yemo popo tonjili ye aili paa olandopa\*\* akumu 1olio ou lipe taponjirimu ye, Yesusi, Pulu Yemonga Malo.\*\*\* Kinié 'Yuni lipe taponjirimu, taponjilimo mele aku sipe sike tembala.' nimbu tondolo mundupu pilipulie nimbu para silimolo mele siye naa kolopo aku sipu ingi sipu ambolopo molamili.

<sup>15</sup> 1Kurumanga nomi, Setenene olio kondi tolemo kinie 'Molo!' nimbu ulu pulu kerime topo manie mundumulundu tondolo naa pupili molemolo kinie olionga popo tonjili ye aili olandopamone kanopa naa kondo kole moye? Yu kanopa kondo kolemo. Setenene olio ulu lupe lupema pali kondi tolemo mele ou aku sipe olionga popo tonjili ye aili olandopa Yesusi kondi torumu, nakolo kondi torumu kinie naa pilipe lipe ulu pulu kerimenga te naa terimu.

<sup>16</sup> Akumunge 1Setenene olio kondi tolemo mele ou Yesusi kepe aku sipe kondi torumu mele pilipulie, olio Pulu Yemo molemona pipili naa

kolopo nondopo pupu yunge kumbikerena yu kinie ungu niemili. Setenene olio kondi tomba molo umbuni te pemba kinie 'Pulu Yemo yu we kondo kololi ulu pulumu pelemo yemo, olio kanopalie kondo kolomba yemo, akumunge olio lipe taponjimbe.' nimbu aku sipu pipili naa kolopo yunge kumbikerena sumbi sipu pamili.

## 5

<sup>1</sup> Walse walse ıJuda yambomanga ningu, Pulu Yemo popo tonjili yemanga ye te 'popo tonjili ye aili olandopamo\* molopili.' ningu, kanoko mako toko 'kongono tepili.' nilimele mele i sipe: Pulu Yemone mana yambomanga ye te mako topalie 'yu Pulu Yemonga kumbikerena yunge kongono tenjipe mana yamboma lipe taponjipili.' nilimo. Popo tonjili ye aili olandopamo yuni yamboma lipe taponjimbendo yambomane Pulu Yemondo 'Ange' ningu silimele mele lupe lupema yuni lipe Pulu Yemo sinjipe, 'Yambomanga ulu pulu kerime mundupe kelepili.' nimbe kongi melema Pulu Yemo popo topa kalonjipe silimo.

<sup>2</sup> Kanu popo tonjili ye aili olandopamo yu kepe mana ye tela; Pulu Yemone "Teai." nilimo unguma pilipe lipe tembando yu umbuni pelemola, akumunge yamboma Pulu Yemonga unguma pilku sundukulie yunge aulkena lou liku molemele yamboma kondo kolopa lipe taponjilimo.\* ıYu yuyu kepe mana ye te naa molopa Pulu Yemonga ungumu tembando umbuni naa pelkanje yuni yamboma kondo kolopa lipe taponjimbe aulke te naa lelka.ı

<sup>3</sup> 1Wale mare yu yuyu kepe Pulu Yemone 'Teai.' nirimu mele naa telemola, akumunge yambomane ulu pulu keru teringimenga popo tonjipe melema kalopa Pulu Yemo silimo aku mele 'yunge ulu pulu kerime mundupe kelepili.' nimbe popo topa kalopa silimola.

<sup>4</sup> Pulu Yemo popo tonjili ye aili olandopamonga ungu te pelemola. Ye tene yuyu 'Nanga imbimu ola molopili, popo tonjili ye aili olandopamo molambo.' naa nilimo. Ou pulu pulu Pulu Yemone Erono mako torumu mele\* aku sipe yandopa yandopa kepe mako topa 'Aku kongonomo tei.' nilimo yemo mindi aku kongonomo telemo.

<sup>5</sup> Aku sipe mele 1Pulu Yemone lipe mundurumu, ye nomi Kirasimu\* yu kepe yuyu 'Nanga imbi ola molopili kene popo tonjili ye aili olandopamo molambo.' naa nirimu. Pulu Yemone 'Yu imbi ola molopili.' nimbelie nimbendo:

"Nu nanga Malo.\*\* Kinié na nunge Lanie."\*\*\* nirimu. 1'Yu mako topo 'nanga kongono tenjipe melema nokonjipili.' nikiru mele yamboma piliengi!' nimbelie aku sipe nirimu kanumu.1

<sup>6</sup> Boku tenga Pulu Yemone ungu te pea nimbendo:

"Mellekisedeke molorumu mele\* nu nunu aku siku Pulu Yemo popo tonjili ye te alieli molko mindi puni."\*\* nirimu.

<sup>7</sup> 1Kirasinge ungu te pea i sipe:, Yesusi ya ma koleana molopalie nirimumuni, Pulu Yemone "Tei." nirimu mele taka lepa pilipe lipe tepa 'Yunge imbi manie molopili.' nirimumunge

yu kolomba aulkena manda wendo linjimbe ,Pulu, Yemo kinie ungu nimbe tondolo mundupe walsipe kola tepa mawa terimu kinie\* mawa terimu mele Pulu Yemone pilirimu.

<sup>8</sup> Sike yu Pulu Yemonga Malo nakolo yu mindili norumu akumuni yu Pulu Yemone “Tei.” nirimu unguma pilipe lipe tenge panjipe temba mele pilirimu.

<sup>9</sup> Aku sipe terimumunge yu Pulu Yemone “Tei.” nilimo unguma paa toyo topa pilipe lipe tepa, kongono simbema paa tepa konjimbe yemo molopalie, yunge ungumu pilku liku tenge panjiku telemele yamboma lipe taponjipe, ene mindili nolemelka aulkena wendo lipe, yu kinie pea molko konjingi aulkena lipe monjilimo yemo molemo.\*

<sup>10</sup> ,‘Aku sipe tepa molomba yemo molopili kene ‘Popo tonjili ye aili olandopamo molopili.’ niembo.’, nimbe Pulu Yemone yundu ‘Ye Mellekisedeke popo tonjili yemo molorumu mele nu aku siku popo tonjili ye aili olandopamo molani.’ nimbe mako torumu.

<sup>11</sup> Yesusi yu Mellekisedeke popo tonjili yemo molorumu mele popo tonjili ye aili olandopamo molemo mele ungu aisili we pelemo nimbundu nane kepe perekero. I ungumunge ungu pulumu ,paa tondolomo,. Nimbu silke nakolo ene ungu aisili nimbu silioma pilingindu mindili sikulie naa pilimelemonga i ungu nikirumunge ungu pulumu ene nimbu simbu mele koropo kelkero.

<sup>12</sup> Ene paa koronga ou Kirasinge yamboma moloringi,\* akumunge kinié ene Pulu Yemonga unguma mane sili yamboma molko yambo mare

mane silimelka nakolo ambolango kokele sukuli tengendo 'A B D piliengi!' ningu mane silimele aku mele ene aku siku Pulu Yemonga ou pulu pulu ungu pulu ou kumbi lelko pilimelkama naa pilimelemonga yambo tene 'Ene mane siembo.' nimbelie ,Pulu Yemone Kirasi mana lipe mundurumu, yu olionga nimbe kolo wangopa kolonjirimu, ungu akuma mindi altopa manda mane simbe kinie pilinginje, ,ungu tondoloma manda mane naa simbe. Naa pilimelka,. Ene ambolango pamema mele ame mindi nolemele, langi tondoloma manda naa nolemele.

<sup>13</sup> ,Kirasinge, yambo ame mindi nolemele akuma ambolango pamema mindi molemele. Nambolka uluma telemele kinie Pulu Yemone 'yambo sumbi nilime' nimbe kanopa, nambolka uluma telemele kinie Pulu Yemone 'yambo sumbi nilime naa molemele.' nimbe kanolemo aku ulumanga puluma mimi siku naa pilimele akumunge ,'ene ambolango pamema mindi molemele.' nikiru,.

<sup>14</sup> Nakolo langi enge nili akuma yambo yu mane mindi nolemele. Yambo mare mimi siku kanoko pilkulie 'I ulu peangama, i ulu kerime.' ningu apuruku pilku molemelema mindi langi enge nilime manda nolemele.

## 6

<sup>1-2</sup> Kapola, ,Kirasi olionga popo tonjili ye aili olandopamone\* olionga nimbe manda tenjimbe-monga,\*\* ungu tondolo mare pilimoloma we pelemo kene kokele Kirasinge yamboma molorumulu kinie mane siringi pilirimulu A B D

unguma mindi konopu kimbu sipu naa molamili.  
 'Ou ningu siringi A B D unguma mindi altopo  
 piliemili mane siengi.' ningi liemo i siku  
 mele telemele: Ulke takongendo ponga polemele  
 akumu mindi konopu kimbu siku molko, wale  
 aisili ponga mindi polemele nakolo ulkemo kamu  
 naa takolemele mele ene A B D unguma mindi  
 pilku molko, olandopa ungu tondoloma naa  
 pilku molemele yambomane aku siku telemele.  
 'Ou kumbi lelko ningu siringi ungu kanuma i  
 sipe mele:'

Konopu alowa teko 'Pulu Yemonga ungumu  
 'Sike' ningu,

tondolo munduku pilimele.\*\*\*

Konde molko konjiku mindi puli ulu pulumu naa  
 pepa

kololi ulu pulumu mindi pelemo uluma pali

liku bulu silimele unguma.

No lingíndu no limelemonga ungu pulu aisili  
 nilimele.

'Pulu Yemone sewe anjipili.' ningu yambomanga  
 pengena

molo pendekona ola kini ambolongemonga  
 unguma.

'Yamboma kolkolie lomboroko ola molonge.'  
 ningu

ungu aisili ningu,

Pulu Yemone mana yamboma kote tenjipe  
 pilipelie

yambo mare 'molko konjiku mindi pangi.'  
 nimbe,

yambo mare 'molko kenjiku mindi pangi.'  
 nimbémonga



ungu mane silimele unguma. Aku ulumanga unguma mindi ningu pilku naa molangi. Yambo yuma ungu manema pilimele mele aku sipu pilipu molamili.

<sup>3</sup> Kapola, ou kumbi lelko mane siringi ungu akuma munduku kelko Pulu Yemone oliondo 'Umbu konopu peli yambo yuma molko ungu olandopa piliengi!' nimu liemo aku sipu temolo.

<sup>4-6</sup> 'Pulu Yemone "Kapola." nimu liemo temolo.' nikiru, akumunge ,pulumu i sipe:, Pulu Yemone Kirasi lipe mundurumu kinie yuni omba tenjirimunge pulumu pilku konjiku 'Sike' ningu pilku limele yamboma mulu koleana mele we silimo melema\* liku, yambo lupema kinie pea Mini Kake Telimu konopuna liku, Pulu Yemonga ungumu ou pilku likulie 'Aku ungumu paa peanga.' ningu pilku, Pulu Yemonga tondolomone pe kolea pora nimbé walemonga ulu enge nilime temba aku tondolomone kinié ulu tondoloma telemo uluma kanoko, aku uluma pali tekolie altoko konopu alowa teko 'Naa pilimulú.' ningu Kirasi munduku kelengi liemo kelko manda konopu alowa teko Kirasinge unguma 'Sike' ningu tondolo munduku pilku yando onge aulke te paa naa lemo.\*\* Yambo tene aku sipe telemo aku ulumuni ,Pulu Yemonga, Malo\*\*\* altopa 'kolopili.' nimbe unju perana uku topa panjipe, 'yambomane yu kanoko ungu taka tonjengi.' nilimo.

<sup>7</sup> ,Kirasi munduku kelkolie kelko konopu alowa teko Kirasinge yamboma altoko manda naa molongemonga ungu iku te tambo:, Lo tolemo kinie mana no aisili pupe, aku mana

ponie telemele yambomane langi kapola liku nonge langime omba konjilimo kinie Pulu Yemone aku sipe kanu mamó tepa konjilimomonga aku telemo.

<sup>8</sup> Nakolo ma tenga siri ka kinie\* era keru lupe lupe olemo kinie kanu mamó ma keru, Pulu Yemone 'lepa kenjipili.' nimbé uluma telemo. Pe walse ma akumu tepene nombá.

<sup>9</sup> Nanga paa pulu lemo angokeme, 'Kirasinge yamboma molkolie pe yu munduku kelemele yambomando, aku sipu nilio nakolo ene pepá topo sikiru yamboma 'aku siku naa tenge' nimbu pilipu molio. 'Ene 'ma peanga mele molko, Pulu Yemone ene lipe taponjilimomonga ene mindili nolemelka aulkena wendo ongo, yu kinie pea molko konjingí aulkena pungí uluma\* teko molemele.' nimbu kanolio.

<sup>10</sup> Pulu Yemone enenga uluma pilipe sundupe naa apurulimo. Ulu sumbi nilime mindi telemo. Enenga kongono telemelema kinie, ene Pulu Yemo konopu monjingíndu yunge yamboma liku taponjilimele mele kinié kepe alieli telemele uluma kinie, kanopa keru kanopa mundupe naa kelemo. 'Pilipe mindi molemo.'

<sup>11</sup> 'Ene pali aku siku telemele mele tondolo munduku teko molko siye naa kolangi mana molonge walema pora nipili.' nimbu paa konopu lelio. 'Pe Pulu Yemone 'Ólio simbu.' nirimu mele peangama sike limulú.' ningu tondolo munduku pilimele mele 'manie naa pupili.' ningu aku teayo.

<sup>12</sup> 'Ene siye naa tepili.' konopu lepo molio. 'Yambo Pulu Yemo 'Sike' ningu tondolo

munduku pilku siye naa kolkolie Pulu Yemone 'yunge ambolangoma monge melema simbu.' nirimu melema sirimu liringi yamboma mele manda lelko molangi.' konopu lepo molio.

<sup>13</sup> Ou Pulu Yemone ,olionga anda kolepa, Eporayamo kinie ungu te nimbe panjipelie, ,paa olandopa molemo yambo tenga imbi lepa, mi lembando\* Pulu Yemo yu maniendopa yambo te paa olandopa te naa molorumumunge Pulu Yemo yuyu yunge imbi lepa mi lepalie

<sup>14</sup> nimbendo:

"Nane paa sike nikiru.

Nane nu sewe anjipu,

'Yambo aisili kalko lieni.' nimbú.".\*

nirimu.

<sup>15</sup> Aku nirimumunge pilipelie Eporayamo ,Pulu Yemone, yu 'mele simbu' nimbe panjirimumu 'Pe sike tepa konjipelie simbe.' nimbe ou siye naa kolopa we nokopa molopalie sike lirimu.

<sup>16</sup> Yambo tene ' 'Paa sike nikimu.' ningu piliengi!' nimbe yunge yambo te aili olandopa molemomo imbi lepa "Paa sike nikiru." nimbe mi lemo. 'Yambomane yunge ungumu toko manie naa mundunjengi.' nimbelle aku telemo.

<sup>17</sup> Akumunge, aku sipe melela Pulu Yemone ' 'Eporayamo kinie nimbu panjikiru mele yuni kalopa limbe yambomane paa pilku konjengi. Nane "Tembo." nimbu panjilio mele konopu alowa naa tepo paa sike telio.' ningu kanangi.' nimbe ,yunge imbi yuyu lepa, "Paa sike nikiru." nimbe mi lerimu.

<sup>18</sup> Pulu Yemo yu 'konopu alowa naa telemo, ene kinie "Tembo." nimbu panjikiru mele pe

pe kepe ‘Sike temba.’ ningu konopu kimbu siku molangi.’ nimbe aku ulutolo terimu. 1 Ulu te: Ungumu ou nimbe panjirimu. Ulu te: Ungumu nimbe panjipelie pe yunge imbi yuyu lepa ‘Paa sike tembo.’ nimbe mi lerimu aku ulutolo terimu kanumu. 2 Aku ulutolo Pulu Yemo konopu alowa manda naa tepa, kolo paa manda naa tolemo ulutolo. Akumu pilipulie ‘Pulu Yemone olio ‘simbu.’ nimbe panjirimu melema sike simbe.’ nimbu pilipu ‘Umbuni te wendo naa opili, olio nokopili.’ nimbu Pulu Yemo molemona nondopo pulimolo yamboma olionga konopu tondolo pupili siye naa kolopo manda nokopo molomolo.\*

19 1 Aku ungumunge ungu iku te topo siembo: 2 ‘Nona andoli sipi te poporomene nona topa memba pumbe.’ ningu tenga ka teko panjilimele.\* Aku sipe olionga minime sipi mele. ‘Pulu Yemone olio kinie ‘tembo’ nilimo ungumu kolo naa topa sike telemo temba.’ nimbu pilimolo ulu akumu minimenga ka mele tenga ka telemo. Aku telemomonga yunge ungumu mundupu kelepo anju pupu molopo naa kenjimulú. Aku kamo Pulu Yemo molemo suluminia paa kake teline,\*\* múlu aili tene pipi silimo,\*\*\* akuna sukundu pupe ka telemo.

20 Kanu suluminia paa kake teline ye te olionga nimbe lipe taponjimbendo kumbi lepa sukundu purumu. Pupelie Mellekisedeke\* molorumu mele yu aku sipe alieli olionga nimbe Pulu Yemo popo tonjili ye aili olandopamo molemo.\*\* Akumu Yesusi.

## 7

<sup>1</sup> ı ‘Kirasi Mellekisedeke mele molemo.’ nikiru, kanu ye Mellekisedeke yu\* kolea aili Salleme yambomanga ye nomi kingimu molopalie, Pulu Ye Paa Olandopa Koleamanga Pali Nokorumunge kongono tenjimbendo yambomanga Pulu Yemo popo tonjipe molorumula.\*\* Ou Eporayamo kolea tenga pupe opa tepa ye nomi kingi kisenga ami yema topa mundupelie ıene meringi melema lipe memba,\*\*\* kelepa lkondo ombá orumu kinie kanu ye Mellekisedeke kanumu yu omba aulkena kanopalie ‘Pulu Yemone nu sewe anjipili.’ nirimu.

<sup>2</sup> ı Yuni aku sipe Pulu Yemo kinie ungu nimbe Eporayamonga mawa tenjirimu kinie, Eporayamone tene tene nimbe merimu melemanga pali telu telu nimbe ıpeangama, wendo lipe Mellekisedeke sirimu. Mellekisedeke yunge imbimunge ungu pulumu ‘ulu sumbi nilime telemo ye nomi kingimu’. Yu nokorumu kolea aili Sallemenga imbimunge ungu pulumu ‘yamboma kinie taka lelko kapola kapola mololi ulu pulumu’ akumunge yemonga imbi talo sipemo ‘Yamboma Kinie Taka Lelko Kapola Kapola Mololi Ulu Pulumu Nokolemo Ye Nomi Kingimu’.

<sup>3</sup> Yunge ‘Temanemo bokuna tonjirimu yemone yunge anumu lapatolonga imbitolo naa topa, yunge anda kolepa tenga imbimu kepe naa tonjirimu. Yu meringi walemo kepe naa tonjipe, kolorumu walemo kepe naa tonjirimu.\* Yuni popo tonjili yemo molorumu mele walse mundupe kelerimu ungu te bokuna naa tonjirimu naa pilimolomonga yu Pulu Yemonga

Malo\*\* alieli konde molopa mindi pulimo mele yu aku sipe mele molorumu.' nimbu pilimolo.

<sup>4</sup> Mellekisedeke yu imbi paa olandopa molorumu mele pilieyo. Olio yambo talape aisilinge pulu pulu anda kolepa paa aili Eporayamone opa tepalie mele lirimumanga pali tene tene nimbe melemanga telu telu nimbe wendo lipe yu sirimu.

<sup>5</sup> Ou ye nomi aili tene yunge yambomanga mele tene tene ningu nosiringimenga telu telu nimbe yuni wendo lirimu nakolo Isirele yamboma laye lupe mele teringi. LLipaini kalopa lirimu ye mare\* Pulu Yemo popo tonjili yema moloringi, kanu yemanga ungu mane\*\* te pelemo, akumu i sipe mele:

'Isirele yambomanga mele tene tene ningu nosingí melemanga telu telu ningu wendo liku LLipai yema siengi.'\*\*\*

nimbe pelemo. Melema siringi yamboma kinie LLipai yema kinie angenupili, ene pea pali Isirele yamboma Eporayamone kalopa lirimu nakolo LLipai yemane angenupilinge melema aku siku mare liringi.

<sup>6</sup> Mellekisedeke yu LLipaini kalopa lirimu ye te molo nakolo Eporayamone LLipai yamboma ou naa kalopa lipili, yunge mele tene tene nimbe melemanga pali telu telu nimbe wendo lipe Mellekisedeke sirimu lirimu. Pulu Yemone kanu yemo 'yu kinie tembo.' nimbe panjirimu yemondo Mellekisedekene 'Pulu Yemone sewe anjipili.' nirimula.

<sup>7</sup> Olio pilimolo: 'Ye tene 'Pulu Yemone nu sewe anjipili.' nilimo aku yemo yu ye olandopamo,

ye tendo ‘Pulu Yemone nu sewe anjipili.’ nilimo ye akumu maniendopamo.’ nimbu pilimolo. ,Aku liemo Mellekisedeke olandopa, Eporayamo maniendopamo.,

<sup>8</sup> ,Akumunge ungu te pea pelemo mele i sipe:, LLipai yemane Isirele yambomanga mele tene tene ningu nosiringi melemanga telu telu ningu liringi yema koloringi, nakolo Eporayamonga mele tene tene nimbe merimumanga telu telu nimbe lirimu yemo Pulu Yemonga bokuna yu kolumu ungu te nimbe naa molemo, akumu pilimolola.\*

<sup>9</sup> ,Aku ungumunge, olione ungu te pea i sipu mele manda nilimelka: Eporayamone yunge mele tene tene nimbe merimu melemanga telu telu nimbe lipe Mellekisedeke sirimu kinie ‘Pe LLipai yemane tene tene ningu nosiringi melemanga telu telu ningu liringi yema\* kalopa lirimu anda kolepa LLipaini ou yunge mele tene tene nimbe nosirimu melemangala Eporayamone telu telu nimbe lipe Mellekisedeke sinjirimu.’ aku nilimelka.

<sup>10</sup> Sike LLipai ou naa meringi nakolo LLipai yunge anda kolepa Eporayamonga olona sukundu molopili Mellekisedekene Eporayamo aulkena kanorumu akumunge ,aku sipu nilimelka.,

<sup>11</sup> ,Kapola, akumu pilipu pora sipulie kinié Yesusi Kirasi molemo mele\* altopo piliemili., Ou Mosisini Isirele yambomando Pulu Yemonga ungu manema simbendo ungu mane te sipelie nimbendo: “LLipai yambomane Pulu Yemo popo tonjili kongonomo teangi.” nirimu. ‘Aku siku

teangi.’ nirimu kinie kanu popo tonjili yemane kongono teringi mele kapola terimu liemo “,Ou pulu pulu popo tonjili ye aili olandopa, Eronone\*\* kalopa lirimu popo tonjili yema mele kinié aku sipe ye te naa molopili. Mellekisedeke mele ye te kinié molopili.” nirimu akumu nambemuna nirimuye? ,Kanu popo tonjili yemane yambomanga ningu tenjiringimunge yambomane ulu pulu kerime konopuna we perimuna Pulu Yemonga kumbikerena manda naa puringimunge Pulu Yemone aku nirimu.’\*\*\*

12 Akumunge Pulu Yemone yu popo tonjili yema alowa tembando ungu manemo kepe alowa naa temu liemo kapola naa temba. ,Akumunge ungu manemo sike alowa terimu.,

13 Pulu Yemone ,‘popo tonjili ye aili olandopamo kolo wangopa molopili.’, nirimu kanu yemo ,yu Isirelenga malo LLipaini kalopa lirimu yambo talapemonga suku molorumu ye te molo., Yu Isirelenga malo tene lupe kalopa lirimu yambo talapemonga suku molorumu ye te. Yunge angenupili lapali kepe te Pulu Yemo popo toko kongi melema kaloringi polona puku kongono naa teringi.

14 Olio pilimolo, olionga Ailimu\* ,Isirelenga malo, Judane kalopa lirimu, aku yambomanga ‘te Pulu Yemo popo tonjili ye te molomba.’ nimbe Mosisini ou naa nirimu kanumu.

15 Kinié ye konde te popo tonjipe molemo paa mona lemona kanokomolo akumu ‘Mellekisedeke yu molorumu mele aku sipe yu popo tonjili ye te lupe, popo tonjiringi LLipai ye akuma lupe.’ nimbu akumu manda sumbi



sipu nimbu kanopolie ı‘Ou Pulu Yemo popo toringi aulkemo maniendopa; kinié olio Pulu Yemo popo tomolo aulke olandopamo wendo okomo.’ nimbu sumbi sipu kanokomolola.ı\*’

16 Kanu yemo ungu manemone ‘LLipaini kalopa limbe yema popo tonjili yema molangi.’ nirimu akumanga yu popo tonjili ye te naa molorumu, molo. Nakolo yu alieli konde molopa mindi pumbemonga tondolomo perimumunge yu popo tonjili ye te molorumu, yu toko manie mundungı aulke te molo.

17 Pulu Yemone yundu ou ungu te nirimu. Yuni nimbendo:

“Mellekisedeke molorumu mele  
nu nunu aku siku Pulu Yemo popo tonjili ye te  
alieli molko mindi puni.”.\*  
nirimu.

18 ı‘Aku ungumuni olio i sipe mele lipe ora silimo: ‘LLipai yemane ‘yambomanga’ ningu Pulu Yemo popo tonjiku molangi.’ nirimu.ı Ungu mane oumu pange tepa olio lipe taponjimbe enge te naa perimuna Pulu Yemone ‘kanu ungu manemo kamu manie pupili.’ nirimu,\* akumu lipe ora silimo.

19 ı‘Mosisiniı ungu mane sirimumane Pulu Yemone yamboma kanopa ‘ulu pulu kerime konopuna naa peli yamboma’ nimbe kanomba aulke te naa lerimu\* kanumu. Akumunge ı‘kanu popo tonjili yemanga ungu manemo alowa tepalieı Pulu Yemone aulke konde peanga te lupe akisirimu, akumu olandopa, ou ungu manemo maniendopa, aku aulke kondemonga pupulie

olio Pulu Yemo molemona nondopo manda pulimolo.

<sup>20</sup> Akumunge ungu te pea i sipe: „Pulu Yemone ‘Yesusi kanu aulke kondemonga popo tonjili yemo molopili.’ nirimu,“\* akumu kepe we naa nirimu. Yu ‘aku popo tonjili yemo molopili.’ nimbe “Paa sike nikiru.” nimbe, nimbe panjipe mi lerimu. Ou popo tonjili ye moloringime ‘aku siku teko molangi.’ nimbe Pulu Yemone mi naa lerimu,

<sup>21</sup> nakolo ‘Yesusi Pulu Yemo popo tonjili ye te molopili.’ nimbe Pulu Yemone „Paa sike nikiru.” nimbe, mi lerimu. Yuni yundu nimbe panjipelie

“Ailimuni yunge imbi yuyu lepa  
 “Paa sike nikiru.” nimbe mi lepalie  
 “Nu popo tonjili ye te moleno mele  
 alieli aku siku molko mindi puni.”  
 nimbe panjipe mi lerimu.

Yu pe konopu alowa tepa  
 ungu te lupe paa naa nimbé.”  
 nirimu.\*

<sup>22</sup> Pulu Yemone Yesusi mako topa yu kinie aku sipe nimbe panjipelie ‘Paa sike nikiru.’ nimbe mi lerimumunge Yesusi olionga popo tonjili yemone olionga nimbe lipe taponjilimomonga Pulu Yemone olio kinie nimbe panjirimu ungu kondemo\* olandopa, „ou Isirele yamboma kinie nimbe panjirimu ungumu maniendopa,“\*\*

<sup>23</sup> „Akumunge ungu te pea i sipe: „ Ou popo tonjiringi yema alieli konde molko mindi naa puku, alieli kolkolie altoko mare kolo wangoko moloringi akumunge ene aisili moloringi,

24 nakolo Yesusi alieli konde molopa mindi pulimona yu kamu kamu popo tonjili yemo molemo mele molomba. Yu olionga popo tonjili yemo molemo mele yambo tene 'Naa tepili. Manie pupili.' nimbé aulke te molo. Akumunge alieli popo tonjili kongonomo mundupe naa kelepa, tepa mindi pumbe, ye tene yu manda alowa naa temba,.

25 Akumunge alieli konde molopa mindi pupelie 'Pulu Yemone ene lipe taponjipili.' nimbe alieli mawa tepa molemomonga\* yambo marene ningulie 'Yesusini sike nanga nimbe tenjirimu.' ningu tondolo munduku pilku yunge imbi walsikulie Pulu Yemo molemona nondoko pulimele yambo akuma yuni 'Mindili nolemelka aulkena wendo ongo Pulu Yemo kinie molko konjingi aulkena pangi.' nimbe\*\* alieli aku sipe manda lipe taponjilimo.\*\*\*

26 Popo tonjili ye aili olandopa\* aku sili tene olionga nimbe tenjilimo mele papu tenjipe molemo. Yu Pulu Yemone kanopa 'ye paa kake teli' nimbe kanolemo yemo molopa, ulu te tepa naa kenjipe, ulu keru te walsikale kepe 'Teambo.' konopu naa lepa, yambomane ulu pulu keru teringi kinie 'Na kinie pea teamili.' nimbe naa terimu, akumunge Pulu Yemo yuyu mulu koleana paa olandopa molemona 'molopili.' nimbe monjirimu.

27 Ou popo tonjiringi ye aili olandopamane teringi mele telemo aulke te naa lemo. Enene walemanga taki taki Pulu Yemo popo toko kongi melema kalko singindu ou 'enenga ulu pulu kerime manie pupili.' ningu melema popo

toko kalko sikulie, pe ‘yambomanga ulu pulu kerime manie pupili.’ ningu melema popo toko kalonjiku siringi,\* nakolo Yesusini aku sipe naa telemo. Yu yuyu walsikale mindi Pulu Yemo popo topa yunge kangimu sirimu aku sipe ,‘Yambomanga ulu pulu kerime kamu manie pupili.’ nimbe, walsikale mindi Pulu Yemo popo topa kalonjipe sirimu.\*\*

<sup>28</sup> ,Aku nikiru ungumunge ungu te altopo kamu niembo,; Ungu mane te pelemomo pilku tenge panjiku tengendo ye mako toko ‘popo tonjili ye aili olandopama molangi.’ nilimele ye enge naa pelime,\* nakolo Mosisini kanu ungu mane sirimumu ou wendo orumu, Pulu Yemone Malondo “Nu popo tonjili ye aili olandopamo molani.” nimbe “Paa sike nikiru.” nimbe, nimbe panjipe mi lerimu ungu akumu pe wendo orumu. Kanu Malo ulu pulu keru te paa naa tepa Pulu Yemone “Tei.” nirimu unguma paa pali pilipe lipe sumbi sipe terimu ye alowa naa tepa konopu tondolo pupili konde molopa mindi pumbe yemo molemo.

## 8

<sup>1</sup> Nane ‘,Pulu Yemone mako topa, ‘Olionga popo tonjili yemo molopili.’ nirimu.’ nikiru akumunge ungu pulumu i sipe: Ye nindu kanu sili\* te olionga popo tonjili ye aili olandopa molemo kanumu\*\* ,melema pali nokombando, mulu koleana Ye Nomi Kingi Aili Olandopamo kolea nokopa molemo polomonga ki umbukundu pupe molemo.\*\*\*

2 Akuna molopa yu mulu koleana angilimo  
 1 sele ulkemonga, suluminia paa kake telimunge\*  
 olionga nimbe Pulu Yemo popo tonjipe molemo.  
 1 Yu aku kongonomo tenjipe molemo, sele ulke  
 akumu Pulu Yemo molemo sele ulke sikemo.  
 Akumu ye tene naa takorumu, Ailimu yuyu  
 takorumu.\*\*

3 1 Yu akuna telemomonga pulumu i sipe:,\*  
 Pulu Yemo popo tonjili ye aili olandopamane  
 1 Mosisini sirimu ungu manemone nirimu mele  
 pilkulie tengendo, Pulu Yemo popo toko we  
 melema kinie kongi mele kalolime kinie mengo  
 ongo siringi, akumunge ye Pulu Yemo popo  
 tonjili ye nomi aili olandopa 1 pe orumu ye  
 Yesusi, nikiru akumuni Pulu Yemo popo topa  
 1 meme peli, melte naa silkenje kapola naa telka  
 akumunge yuni kepe melte popo topa sirimula.

4 Nakolo ma koleana Pulu Yemo popo tonjili  
 ye\* ungu manemone\*\* nilimo mele pilkulie Pulu  
 Yemo popo toko kongi melema kalko silimele  
 yema molemelemonga\*\*\* kanu yemo yu ma  
 koleana molkanje Pulu Yemo popo tonjili ye te  
 naa molka.

5 Kanu yemane popo tonjili kongono telemele  
 akumu Pulu Yemo molemo mulu koleana telemo  
 kongonoma none tepa, mulu koleamonga min-  
 imu mele none teko molemele. Akumunge  
 Pulu Yemo mana molomba sele ulkemo Mosisini  
 kokele takomba terimu kinie Pulu Yemone yu  
 mane sipelie nimbendo:

“Nane mulú Sainai ola  
 Mosisi nu lipu ora sindu aku sipe mele  
 melema pali paa sumbi siku manda lelko  
 teani.”.\*

nirimu.

<sup>6</sup> ɿAku sike nakolo, kanu yemanga Pulu Yemo popo tonjili kongonomo paa maniendopa. Pulu Yemone Yesusindu ‘Tei.’ nimbe sirimu popo tonjili kongonomo paa peanga olandopa. Yunge kongonomo olandopa telemomonga pulumu i sipe: Pulu Yemone olio kinie ungu konde nimbe panjipe mi lerimumu\* Yesusi ai suku singine angilipe ‘Pulu Yemo kinie olio kinie kapola kapola molangi.’ nimbe lipe taponjilimo yemone ‘kamu wendo opili.’ nimbe tenjirimu, aku ungu kondemo olandopala. Ungu kondemone ‘olio simbu.’ nimbe panjilimo aku melema olandopa, ungu oumuni ‘simbu.’ nirimu aku melema maniendopa, akumunge ungu kondemo olandopa.\*\*

<sup>7</sup> Pilieme! Pulu Yemone nimbe panjipe mi lerimu ungu oumunge tondolomo pelkanje\* Pulu Yemone altopa ungu te naa nimbe panjilke.

<sup>8</sup> ɿUngu oumunge tondolomo pelkanje Pulu Yemone yamboma teringi mele kanopa keru naa kanolka., Nakolo yambomane teringi mele Pulu Yemone kanopa keru kanopalie nimbendo:

“Na Aili ɿYawe, ne ɿenendo, nimbundu:

“ɿPilieyo!, Nane Isirele yamboma kinie

Juda yamboma kinie\* ungu konde te

nimbu panjipu mi lembo walemo wendo ombá.

<sup>9</sup> I ungu konde nikiru akumu

ou enenga anda kolepalime kolea Isipi wendo lipu

ulsu membo orundu walemonga kanu yamboma kinie

nimbu panjipu mi lerindu mele\* telu sipe molo.

Nane ene kinie ungu nimbu panjipu  
mi lerindu ungumu naa piliringimunge  
nane 'Ene molko kenjengi!' nimbu lipu bulu  
sirindu.

<sup>10</sup> Isirelene kalopa lirimu yamboma kinie  
kelepo tembo mele pe ungu konde te  
nimbu panjipu mi lembo, akumu i sipe:

┌ 'Ene teko molonge kinie  
nane ene kanopo peanga kanombo.' nirindu  
mele

'konopuni pilku konjengi.' nimbu,  
nanga ungu manema

enenga konopuna pepili panjinjipu,

'Nanga ungu manema konopu monjiku 'Pilipu  
teamili.'

ningu molangi.' nimbu nane kanu ungu  
manema

boku mele enenga konopuna imbi tombo.

Na mindi ene pilku popo tonge Pulu Yemo  
molombo,

ene nane nokombo yamboma molonge.

<sup>11</sup> Aku walema wendo ombá kinie  
yambo kamako imbi molombama kepe,  
koropa imbi naa molombama kepe, akumane  
pali

┌ 'Na Ailimu.' ningu, kanoko imbi singímunge  
yambomane enenga kandi pulu lemo yamboma  
kepe

ulke kere pongolo penge yamboma kepe

'Ailimu molemo mele piliengi!' naa nimulú.

Ene pali na pilku pora singímunge

altoko ningu naa singí.

<sup>12</sup> Nane ene kondo kolopo

enene teko kenjingí uluma mundupu kelenjipu

enenga ulu pulu kerime  
 altopo paa naa pilimbu.”.\* nimbu  
 na Pulu Ye Ailimuni nikiru.”.\*\*  
 nirimu.

<sup>13</sup> Pulu Yemone pe olio kinie nimbe panjipe mi lerimu ungu akumu “Ungu kondemo” nirimu ungu akumuni ou Isirele yamboma kinie nimbe panjipe mi lerimu ungu ou akumu yuni ‘Kamu nondopa manie pumbe tekemo.’ nimbe nirimu. Pe kinié olio pilimolo, mele ou te kamu nondopa manie pumbe tekemo mele, akumu sike nondopa kamu pora nimbé.\*

## 9

<sup>1</sup> ‘Kirasinge kongonomo kinie ungu kondemo kinie olandopa, popo tonjili ye oumanga kongonomo kinie ungu oumu kinie manien-dopa.’ nindu\* kanumunge kinié ungu mare pea niembo., Ou ‘Pulu Yemone Isirele yamboma kinie, nimbe panjipe mi lerimu ungumuni\*\* Pulu Yemo popo toko kapi ningí mele nirimu ungu manema perimu, kanu ungu oumunge Pulu Yemo popo toringi ulke te mana angilirim-ula.\*\*\*

<sup>2</sup> Aku ulkemo sele ulke te takoringi, akuna sukundu suluminia talo lerimu. Takokolie, yunge suluminia kiyekondo lerimuna tepe llame yepoko pakara norumu mélemo kinie pillawa kaloli ‘Pulu Yemonga’ ningu nosiringi polomo kinie nosiringi, aku suluminiamo imbi lelko ‘Suluminia Kake Telimu’ niringi.\*



<sup>3</sup> Anjukundu múlu aili sulu tene pipi sirimu akuna anjukundu Suluminia Paa Kake Telimu lerimu.\*

<sup>4</sup> Pulu Yemo popo tongendo mele mune tolime kaloringi polo kou gollo kanjiringimu kinie\* kete kou gollo kanjiringimu kinie\*\* aku meletolo aku koleamonga meletolo\*\*\* lerimu. Aku ketena sukundu langi mena\*\*\*\* perimu mingi te kinie, Erononga apulu mingi ambolorumu kiri kiri terimu apulumu kinie,\*\*\*\* Pulu Yemone Isirele yamboma kinie mi lerimu unguma kou kará talonga imbi topa monjirimu koutolo kinie, akuma perimu.\*\*\*\*

<sup>5</sup> Aku ketemonga pipine ola mele talo mulu koleana angello none telitolo Pulu Yemonga tondolomo molorumuna lerimutolonga kongomane pipimu kunungu mele pakonjirimu.\* Aku pipimu 'Pulu Yemone yamboma kondo kolopa enenga ulu pulu kerime mundupe kelenjirimu pipimu' niringi.\*\* Nakolo kinié ena te naa pelemomonga aku melemanga ungu aisili manda naa nimbú.

<sup>6</sup> Aku siku ,sele ulkemo kinie akuna sukundu suluminiatolo kinie, teko mimi teko melema teko mimi teko akuna sukundu nosiku pora siringi kinie popo tonjili yema\* pulu monjiku suluminia kiyekondo lerimuna alieli sukundu puku Pulu Yemo popo tonjili kongonomo te pu opu teringi.

<sup>7</sup> Nakolo popo tonjili ye aili olandopamo\* mindi anjukundu suluminia lerimuna sukundu purumu. Taki taki naa purumula. Ponie tenga tenga walsikale mindi purumu. We naa la purumu. Kongi mele te topalie meme mare memba sukundu pupelie yuni ulu pulu keru naa pilipe

walu terimuma kinie yambomane ulu pulu keru naa pilku walu teringime kinie konopuni pilipe aku mememo Pulu Yemo popo topa sirimu.\*\*

8 'Popo tonjili ye aili olandopamo yu manjipe Suluminia Paa Kake Teline sukundu pupili.' nimbe ungu mane te perimu aku ulumuni olio lipe ora silimo mele Mini Kake Telimuni nimbe silimo. Akumu i sipe: Ou Pulu Yemo popo toringi sele ulkemo we angilipili olio Pulu Yemo molemona manda pumulú aulke te naa lerimu mele Mini Kake Telimuni nimbe silimo.

9 Kanu sele ulkena ulu teringimene olio kinié molemoloma ungu te lipe ora silimo. Aku ulumuni olio lipe ora silimo mele i sipe: Ou alieli Pulu Yemo popo toko we melema siku, kongi melema kalko siringi akumane Pulu Yemo aku siku popo toringi yambomanga konopuna ulu pulu keru perimuma kamu kulu naa tonjirimu, we pilku mindi moloringi.

10 Ou Pulu Yemo popo toringi ungu manemane langi nongo, no nongo, kimbu ki kangime kulumiyé tonge aku uluma mindi mane sirimu. Pulu Yemo yu 'enene sumbi siku popo tonge kinie ene yambo konopu sumbi nilime nimbe kanomba ulu kondema wendo ombámonga i ungu mane yambomanga kangikundu tenge mele sirimu ungu manema isili ou teko molangi.' nirimu. ,Aku ulu ou teringime kapola naa terimu mele aku sipe olio kinié lipe ora silimo.,

11 ,Ou aku sipe, nakolo kinié Kirasi yu Pulu Yemo popo tonjili ye aili olandopamo molemo, Pulu Yemone 'mele peangama simbu.' nirimu melema yuni silimo. Ou Isirele yambomanga

popo tonjili ye aili olandopamane\* kongi kera melema kalko Pulu Yemonga kumbikerena puku popo toringi sele ulke akumu maniendopa; akuna teringi uluma maniendopala. Pe Kirasi yu Pulu Yemo mulu koleana molorumu koleana pupe popo topurumu aku koleamo olandopa peangamo; aku mulu koleana angilimo sele ulkemonga\*\* suku Kirasi yu purumu aku sele ulkemo mana yambomane kini naa teringi, akumu mana lemo melemana melte molo.

12 Yu Pulu Yemo mulu koleana molorumu Sulu-minia Paa Kake Teline kamu walsikale sukundu purumu. Nakolo akuna pumbendo ou mana sele ulkemonga suku pungindu teringi mele yu naa terimu. Enene kongi meme pokore kinie kongi kao walo pokore kinie toko memema mingi tenga kolko akumu Pulu Yemonga kumbikerena mengo puringi mele aku sipe naa terimu, molo. Yunge mememo mindi yuyu memba pupe walsikale mindi Pulu Yemo popo topa sirimu.\* Aku terimumunge 'olio ulu pulu kerimene ka sipe nokolemo mele naa tepili' nimbe yunge mememone mindili nolemelka aulkena wendo lipe Pulu Yemo kinie kamu tapu topo kapola molomolo aulke pumulumu akisinjirimu.\*\*

13 Pulu Yemone yambo kanopa 'kangimenga kalaro molopili molemele' nimbe kanolemo yamboma yuni kanopa 'kake tepili molonge' nimbe kanopili.' ningulie niringimuni, ou kongi memema kinie kao peleama kinie toko memema kolko, kongi kao ambu kondoli, walo ou naa leli te toko 'tepene nomba pora sipili.' ningu kaloringi kinie norumu kekumu liku,

memena sukundu ondoko munduku nosikulie, kanu yambomanga kangimenga tanda sinjiringi kinie kanu yamboma altopa kanorumu kinie kangikundu yambo kake telime nimbe kanorumuna ‚Pulu Yemo kinie altoko kapola moloringi.‘\*

14 ‚Pulu Yemone ungu nimbe panjipe mi lerimu ungu oumunge uluma tengendo,‘ aku kongimenga mememane yamboma aku sipe lipe taponjirimu liemo pe Kirasinge mememone kinié paa olandopa manda lipe taponjilimo. Yu ulu pulu keru te paa naa pepili alieli molopa mindi puli Mini Kake Telimunge tondolomo yu kinie molopili, yunge kangimu Pulu Yemo popo topa simbendo yu kolorumu. Aku yemonga mememone olionga kangikundu mindi kulumiye naa tonjilimo. ‘Yuni olio ulu pulu keru telemolomonga kolea kerine pupu molopo kenjipu mindi pulimelka ulu pulu keru konopuni pilimoloma\* kulu tonjilimomonga Pulu Yemone olio kanopa keru kanomba ulu te konopuna naa pelemo.’ nimbu pilimolo. Olio ‘Konde Mololi Pulu Yemonga unguma pilku liku yu kanopa peanga kanolemo uluma teangi.’ nimbe aku terimu.

15 ‚Akumunge ungu te pea i sipe: Kirasini olionga ulu pulu kerimenga kolo wangopa mongo lirimuna olio pipili naa kolopo Pulu Yemonga kongonomo manda temolo,‘ akumunge yunge mememo ondo lenjipe kolorumu aku ulumuni Pulu Yemone ungu nimbe panjipe mi lerimu ungu kondemo Yesusini ‘Kamu wendo omba lepili.’ nirimu. Yambomanga nimbe kolon-

jirimu ulumuni ulu talo terimu. ˘Te i sipe˘, Pulu Yemone nimbe panjipe mi lerimu ungu oumu sungu siku yunge ungu manema liku su siku ulu pulu keru teringime Yesusini ‘Manie pupili. Pulu Yemo akuma siye kolopa, akumanga ene mongo naa sipili. Aku teringimenga ene mini pali molko kenjiku mindi pungı aulkena wendo wangi.’ nimbe enenga nimbe kolo wangopa mindili nomba kolopa yunge mememone enenga pundu tonjirimu. ˘Te i sipe˘, Yunge mememo ondo lenjipe kolumumunge ungu oumuni nokorumu yamboma Pulu Yemo pilku moloringimenga konopuma yunge mememone kamu kulumiye tonjipelie Yesusini yambomanga nimbe tenjirimumuni olione ulu pulu keru telemoloma omba manie pulimo, akuma Pulu Yemone altopa naa pilipe molemona Pulu Yemo yuni mako topa “Wai.” nilimo mele pilkulie olemele yamboma Pulu Yemo yuni molko konjiku mindi puli ulu pulumu kinie mele peangama kinie “Nanga pulu lemba yamboma simbu.” nimbe, nimbe panjirimu akuma simbe lingı.\*

<sup>16</sup> ˘Kirasi kolumumunge pulumu niembo˘, Ye tene ‘pe walse na kolombo kinie nanga mele nosilioma nanga ambolangomane liengi!’ nimbe pepá topa nimbe panjilimo. Nakolo ambolangomane kanu melema we manda naa limele. Pe lapa kolemo kinie yambomane kanokolie ‘Kapola. Kinié lapane ‘Moke teko liengi!’ nimbe panjirimu mele kamu liengi!’ nilimele.\*

<sup>17</sup> Ye tene ungu nimbe panjilimo yemo we molemo kinie yunge ungu nimbe panjilimomo uluri manda naa telemo. Yemo kolemo kinie

mindu ungu nimbe panjilimo mele sike aku siku manda melema limele.

18 Ulu pulu akumu pilku teringi aku sipe, ou Pulu Yemone ungu nimbe panjipe mi lerimu mele 'Wendo opili.' ningu, 'Melte kolopili.' ningu, kongi mele te toko\* mememo ondo leringi. 'Melte naa kolkanje Pulu Yemone ou nimbe panjirimu mele wendo naa olka.'

19 'I siku mele teringi,' Mosisini ou 'yamboma piliengi!' nimbe Pulu Yemonga ungu manema\* pali nimbe sipelie kongi kao walo mare kinie kongi meme mare kinie topa memema mingine kolopa, no kinie topele mapele topalie, unju kanga isopo kola mare lipe sipisipi indi kondoli marene ka topalie, memena sukundu mundupelie Pulu Yemone sirimu ungu manema molorumu bokuna kinie yambomanga kangine kinie tanda sipe kanjinjirimu.\*\*

20 Tanda sipe kanjinjipe molopalie nimbendo: "I mememo Pulu Yemone ene kinie ungu nimbe panjipe mi lerimu ungumu 'Pilku teko molangi.' nikumumu 'ene kinie wendo omba tondolo pupili.' nilimo mememo."

nirimu.\* 'Melte kolopili.' nimbe naa tolkanje Pulu Yemone nimbe panjirimu ungumu kamu wendo naa omba tondolo naa pulke.\*\*

21 Aku sipe mele Pulu Yemo popo toko kaloringi sele ulkemo kinie sele ulkena sukundu Pulu Yemo popo tongendo nosiringi melema kinie pali 'Pulu Yemonga mele kake telime lepili.' nimbe Mosisini kongi mele topa meme mingi tenga ondo lepa, mememo tanda sipe kanjirimula.\*

<sup>22</sup> Pulu Yemonga ungu mane te nimbe perimu mele pilipalie Mosisini aku terimu. Kanu ungu manemo nimbe molorumu mele i sipe mele: 'Mele aisili 'Pulu Yemone kanopa 'mele kake telime' nimbe kanopili.' nimbe mememane mindi manda tenjimbe. 'Kongi tenga mememo omba wendo pupili.' ningu 'Yu kolopili.' ningu yunge nomi karu naa lenge kinie Pulu Yemone meme te omba naa pumbe kanopalie meltenga kalaro molo yambo tenga ulu pulu kerime "Manie pupili. Altopo naa kanombo." manda naa nimbé.' ungu mane te aku sipe nimbe pelemo.\*

<sup>23</sup> Pulu Yemone "Melemanga kalaroma mememane topa manie mundunjipili." nimbe ungu mane akumu sirimumunge mulu koleana lerimu melema kepe mana manda lelko tengendo Pulu Yemone nimbe sirimu mele pilkulie teringi kanu mele none teli mana lerimuma 'Kake tepili.' ningu kongimenga mememane aku uluma teringi. Nakolo mulu koleana lemo melema, sike melema lemo, aku melema 'Kake tepili.' ningu kongimenga memema ondo lemelka kinie manda kake naa tenjilke. ıKirasi yunge mememo ondo lepalie kolorumu aku, meme peanga paa olandopamone mindi manda kake tenjirimu.

<sup>24</sup> Kirasi yu ıkolopa lomboropa ola molopalie, ya mana Pulu Yemonga suluminia none teli teringi lerimu suluminia akuna sukundu naa purumu. Yu 'Paa sike suluminiamonga pambo.' nimbe sumbi sipe mulu koleana mindi purumu, we tenga lupe molo. Akuna 'olio lipu taponjembo.' nimbe Pulu Yemonga kumbikerena pupe

molemo.\*

<sup>25</sup> \* Ya mana yambomanga nimbe Pulu Yemo popo tonjili ye aili olandopamo Pulu Yemo molemo Suluminia Paa Kake Teline ponie-manga pali walse walse nimbe mele lupemanga memema memba suku pupe 'Pulu Yemone yambomanga ulu pulu kerime we siye kolopili.' nimbe Pulu Yemo sirimu. Nakolo ,ya mana Pulu Yemo popo tonjili ye aili olandopamone, yambomanga nimbe aku sipe taki taki Suluminia Paa Kake Telimunge sukundu meme te lupe memba purumu mele Yesusi Kirasini aku sipe ,Pulu Yemo molemo, mulu koleana taki taki pupe yunge mememo popo topa naa sirimu.

<sup>26</sup> Mana popo tonjili ye aili olandopamone terimu mele Kirasini aku telkanje , 'taki taki mindili nambo.' nimbe, Pulu Yemone ou pulu pulu ma terimu kinie yuni pulu monjipe mindili nomba pe yandopa yandopa mindili nomba mololipe pulke. Nakolo aku naa terimu. Ma kolea nondopa pora nimbé wale akumunge 'Pulu Yemone yambomanga ulu pulu kerime we siye kolopa kamu naa pilipe molopili.' nimbe mana omba, walsikale mindi yunge mememo olionga nimbe ondo lenjipe Pulu Yemo popo topa sirimu.\*

<sup>27-28</sup> Yamboma pali ya mana walsikale mindi kolkolie pe kote tenjipe pilimbe koleana pungí ulu pulumu pelemo. Aku ulu pulumu paa sike pelemo mele ulu pulu te lupe paa pelemola. Akumu i sipe: Kirasini walsikale mindi 'Yambo aisilinge ulu pulu kerime omba manie pupili.' nimbe yu yuyu 'Walsikale tangi.' nirimu. Pe wale talo sipe kelepa ombá nakolo 'Yambo-



manga ulu pulu kerime nane lipu membo altopo kolonjembo.’ nimbe naa ombá. “Yu ombá.” ningu nokoko molemele yamboma ‘Ulu pulu keripelemo koleamo paa kamu munduku kelko kolea paa peangana puku molko konjiku mindi pangi.’ nimbe\* ene limbendo ombá. Ulu pulumu aku sipe pelemo. Yamboma kinié kolkolie pe kote tenjimbe koleana pungí akumu paa sike mele, aku sipe Kirasi ou olionga nimbe tenjirimu pe omba temba mele akumu paa sikela.

## 10

<sup>1</sup> „Kirasi olionga nimbe kolonjirimumunge ungu te altopo niembo.„ Nomuna kinie kariyápana kinie kanopolie nilimolomone, mele sikema naa kanopo melemanga minime mindi angilimo kanolemolo. Melemanga minime kinie melemanga pikisa doro telemelema kinie akumane sike melema molemo mele we lipa ora silimo, yu yuyu mele sike te molo. Aku sipe Mosisini yambomane Pulu Yemo popo tonge mele ungu mane sirimuma\* pe ulu peanga te wendo ombámonga minimu mele mindi.\*\* Aku ungu manema pilku teringi uluma paa sike melema mele molo. Akumunge ‘Pulu Yemo popo tamili.’ ningulie aku ungu manema pilkulie kongi melema kalko Pulu Yemo siringimene yambomanga ulu pulu kerime kamu kulumiye naa tonjipe, Pulu Yemone ene kamu kanopa ‘konopu peanga kake tepili molemele.’ nimbe kanomba uluri naa tepa, ‘Enene “Pulu Yemo kinie tepo kenjirimulu.” ningu konopuni

naa pilku molangi.’ nimbe uluri naa terimumunge\*\*\* alieli poniemanga pali ene Pulu Yemo popo tongendo ou pulu pulu teringi mele telu siku mindi tengendo kongi melema kalo pu opu teringi.

<sup>2</sup> Aku siku teringi ulumane enenga konopuma kamu kamu kulumiye tonjilkenje altoko kongi melema kalemelkaye? Kamu kamu kulumiye tolkanje walsikale Pulu Yemo popo toko kalko sikulie, enenga ulu pulu kerime manie pulke, kanu kinie ‘Konopukundu umbuni te naa pepa, ulu pulu kerime we naa pelemomonga mongo naa limulú.’ ningu pilkulie altoko kongi mele mare naa kalko aku uluma munduku kelemelka.

<sup>3-4</sup> Nakolo kongi kao peleama kinie kongi memema kinie toko kaloringimenga mememane enenga ulu pulu kerime kamu kulumiye manda naa tonjirimumunge alieli ipulueli tangoli poniemanga pali Pulu Yemo altoko kongi melema kaloliku pukulie Pulu Yemonga ungu manema pulue toringimunge enenga konopuna ulu pulu kerime we pepa mindi purumu mele kelko piliringi.

<sup>5</sup> „Pe kongi melema toko Pulu Yemo popo toko kaloringimenga mememane yambomanga ulu pulu kerime konopuna perimuma manda kamu kulumiye naa tonjirimu, na pilipelie Kirasi ma koleana ombá tepalie nirimumuni, „Pulu Yemondo, nimbendo:

“Kongi mele toko nu kalko siringime kinie,  
mele nu we siringi melema kinie,  
konopu naa monjikulie nuni na

“Yambomanga ningu ma koleana kolonjeni pui.”  
ningu umbu kangi te teko nosirinumuni sikinu.

6 ‘Pulu Yemo kapi niemili.’ ningu  
 ‘Tepene nomba pora sipili.’ ningu  
 kaloringi kongi melema kinie,\*  
 ‘Ulu pulu keru telemolomanga kalopo sikimulu.’  
 ningu kaloringi kongi melema kinie\*\* akuma  
 nu kanoko keru kanorunu.  
 7 Aku kongi mele kaloringime  
 konopu naa monjirinumunge nane nimbundu:  
 “Pulu Yemo, na ya molio kanoyo.  
 Nuni nando “Teani pui.” nirinu mele  
 ‘Teambo.’ nimbu, nanga kangimu yambomanga  
 nimbu  
 nu popo topo simbu, ombó tekero.  
 Nane aku sipu tembo mele  
 ou bokuna toringi molemo kanumu.” nirindu.”.\*  
 nirimu.

8 Sike Pulu Yemone yuyu yambomando “Teai.”  
 nimbe ungu mane sirimu mele pilkulie tengendo  
 kongi melema kalko yu siringi nakolo, Kirasini  
 nirimu mele nikiru aku ungumunge ou Kirasini  
 nimbendo:

“Kongi mele toko nu kalko siringime kinie,  
 mele nu we siringi melema kinie,  
 ‘Tepene nomba pora sipili.’ ningu  
 kaloringi kongi melema kinie,  
 ‘Ulu pulu keru konopuna pelemomanga  
 kalopo sikimulu.’ ningu  
 kaloringi kongi melema kinie, akuma kanokolie  
 nu konopu naa siku kanoko keru kanorunula.”  
 nirimu.

9 Kongi mele kaloringimunge aku sipe nimbelie,  
 pe nimbendo:  
 “Na ya molio kanoyo. Nuni nando “Teani pui.”  
 nirinu mele ‘Teambo.’ nimbu ombó tekero.”

nirimu. ‘Pulu Yemo olio kanopa peanga kanopili.’ ningu yu ou popo tongendo kongi melema kaloringi ulu pulumu ıPulu Yemone, topa manie mundupe, kinié yu molemona non-dopo kapola pumulú aulkemonga ulu pulu konde pe nirimumu ‘Kamu wendo omba tondolo mundupe pepili.’ nimbe yuni Yesusi Kirasindu “Tei.” nirimu mele pilipelie omba terimu.\*

<sup>10</sup> Pulu Yemone yundu “Tei.” nirimu ulumu pilipe lipelie ıYesusi Kirasini, ‘Teambo.’ nimbe omba yunge kangimu walsikale mindi yuyu kamu Pulu Yemo popo topa sirimumunge ıPulu Yemone kanopa peanga kanopalie, olionga ulu pulu kerime mundupe kelenjipe ‘olio yunge yambo kake telime molangi.’ nirimu.

<sup>11</sup> ıAkumunge ungu te pea i sipe:, Walemanga pali Pulu Yemo popo tonjili yema\* ola angilku popo tonjili kongono te pu opu telemele. Paa alieli ipulueli tangoli ola angilku ulu pulu kerime paa manda naa kulu tonjilimo kongi melema popo toko kalonjiku silimele.

<sup>12</sup> Nakolo pe orumu Pulu Yemo popo tonjili ye kanumuni yambomanga pali alieli telemele tenge ulu pulu kerime paa kamu manda kulu tonjimbe ulu te tenjimbendo yuni kamu walsikale mindi yunge toringi kangimu Pulu Yemo popo topa sirimu kinie ıkongi melema toko kalko Pulu Yemo siringi ulu pulumu kamu manie purumu. Yu aku tepalie imbi ola molopili Pulu Yemo kinie melema nokombando, Pulu Yemonga ki umbukundu\* pupe molorumu.\*\* ıMana Pulu Yemo popo tonjiringi yemanga kongonomo pora naa nirimumunge alieli ola angilku

popo toko mindi angiliringi nakolo Kirasini walsikale mindi Pulu Yemo popo torumu kinie kapola terimuna we molorumu.„

<sup>13</sup> Akuna molorumu mele kinié yandopa Pulu Yemone Yesusi yunge opa touma kamu topa manie mundumbe walemo wendo ombámonga we nokopa molemo.\*

<sup>14</sup> Yuni ‘Yambomanga ulu pulu keru telemele konopuna we pelemoma kamu manie pupili.’ nimbe yambomanga nimbe yuyu yunge meme walsikale ondo lenjipe kolorumu aku ulumuni yambo konopuna kake temba telemo yamboma Pulu Yemo kamu kamu kanopa peanga kanomba ulumu tenjirimumunge\* altopa ‚Pulu Yemo pe melte popo topa naa kalombamonga ou molorumu mele kinié we molemo.„

<sup>15</sup> Yuni olionga nimbe tenjirimumunge olio konopu kake tepili molomolo aku ulumundu Mini Kake Telimuni ungu talo nilimo. Ou Mini Kake Telimuni nimbendo:

<sup>16</sup> “Na Ailimuni nimbendo:

“Isirelene kalopa lirimu yamboma kinie kelepo tembo mele pe ungu konde

nimbu panjipu mi lembo akumu i sipe:\*

‘Nanga ungu manema ‚konopu monjiku

‘ ‘Pilipu teamili.’ ningu molangi.’ nimbu,„

enenga konopuna pepili panjinjipu,

‚‘Ene teko molonge kinie

nane ene kanopo peanga kanombo nirindu mele

konopuni pilku konjengi.’ nimbu,„

nane kanu ungu manema boku mele

enenga konopuna imbi tombo.” nirimu.”.\*\*

yuni nilimo.

17 Aku nimbelle ungu te pea nimbendo:

‘ “Enenga ulu pulu kerime kinie  
 ‘Pulu Yemonga ungu manema naa pilipu temolo.’  
 ningu pulue tolemele uluma kinie  
 na altopo naa pilimbu.” nirimu.’\*  
 nilimo.

18 Akumunge Kirasini olionga nimbe tenjirimu-  
 munge Ailimuni olionga ulu pulu kerime ‘Manie  
 pupili.’ nimbe siye kolorumuna kinié olione  
 ‘Olionga ulu pulu kerime manie pupili.’ nimbu  
 altopo kongi melema topo kalopo yu popo topo  
 simulú aulke te naa lemo.

19-21 Angokeme, ‘olio Pulu Yemo paa sike  
 molemo kolea paa kake telimunge suku pipili  
 naa kolopo manda sumbi sipu pupu yunge  
 kumbikerena molomolo.’ ningu tondolo  
 munduku pilimelemonga pulu pokore i sipe:

ᵛTe:ᵛ\* ‘Yesusini olionga nimbe yunge meme ondo  
 lenjirimu mememone olionga ulu pulu kerime  
 kamu omba wendo pulimomonga kinié yunge  
 mememone olio Pulu Yemonga kumbikerena  
 manda pumulú.’ nimbu pilimolo.

ᵛTe:ᵛ ‘Pulu Yemonga mana Suluminia Paa  
 Kake Telimunge suku ‘We yamboma naa pangí.’  
 ningu ou kerepuluna mulu wambale aili ton-  
 dolo tene pipi siringi.\*\* Nakolo pe Yesusi yam-  
 bomanga nimbe kolonjirimu kinie kanu mulu  
 wambalemo ᵛolakondo maniendo sipe, olá topa  
 anju yando purumu. Yesusi toringi kinie  
 yunge kangimu suku nirimu akumu\*\*\* Pulu  
 Yemo yu paa sike molemona olio ᵛwe yamboma  
 pali, kinié manda pumulú aulke kondemo.\*\*\*\*  
 Yunge mana kangimuni tenjirimuni konopu

konde pepili ulu peangama tepo molopo konjipu pumulú aulke kondemo lipe nosinjirimumunge kepe, Pulu Yemonga kumbikerena kinié manda pumulú.’ nimbu pilimolola.

┌Te:┐ ‘Kinié olionga Pulu Yemo popo tonjili ye aili paa olandopamone\*\*\*\*\* Pulu Yemonga yamboma nokolemomonga kepe Pulu Yemonga kumbikerena kinié pipili naa kolopo manda pumulú.’ nimbu pilimolola.

Akumunge,

22 Pulu Yemo molemona nondopo pamolo. ‘Pulu Yemo molemona nondopo pamolo.’ nimbulie nimulúmuni, Kirasini yunge mememo olionga konopuna kanjinjirimumuni olio ulu pulu keru te konopuna naa pepa konopu peanga tepa pepili molopo, ┌ou popo tonjiringi yemane no paa kake teli te lelkolie kangu peanga tepa angilipili Pulu Yemonga ulkena sukundu puringi mele,┐\* olio aku sipu ulu peangama mindi tepo molopo konjipu, kolo toli ungu te konopuna naa pepili ‘Yuni kanopa peanga kanolemo uluma mindi teamolo.’ nimbu, ‘Yuni “Tembo.” nilimo mele paa sike temba.’ nimbu tondolo mundupu pilipulie\*\* ┌‘Pulu Yemone “Tembo.” nilimo mele sike temba molo naa tembanje.’ nimbu konopu talo tepo kimbu naa sipu, olio Pulu Yemo molemona pipili naa kolopo nondopo pupu molamili.

23 “Ene kinie tembo.” nimbe panjirimu yemone kolo naa topa “Tembo.” nilimo mele sike telemo kene ene ‘Yu ‘olio kinie tepo konjimbu.’ nimbe panjirimu mele sike temba.’ ningu ou tondolo munduku piliringi mele siye naa kolko,

ambolko konjiku naa likulie ‘yu paa sike omba temba.’ ningu konopu siku nokoko molangi.

24 ‘Anju yando konopu monjiku liku taponjei.’ ningí aulke te koroko pilku molai.

25-27 Yambo mare angenupili kinie liku maku naa toko ulsu molemele aku mele naa teai. Ene Kirasinge yamboma liku maku toko molkolie anju yando yamboma ‘Konopuna tondolo pupili molko, ‘<sub>1</sub>Kirasi yu, sike.’ ningu tondolo munduku pilimele mele aku siku ningu pilku molangi.’\* niengi. Ailimuni yambomanga kote pilimbe walemo nondopa wendo ombá tekemo\*\* pilkulie i “Teangi.” nikiru mele tondolo munduku teko molai.

<sub>1</sub>Yesusini olionga nimbe yunge toringi kangimu Pulu Yemo popo tonjipe sirimu,\*\*\* ungu sikema pilku likulie kelko ‘Naa pilimolo. Ulu pulu kerime we tepo molamili.’ ningu munduku kelko ulu pulu kerime taki taki teko mindi molongi liemo altoko ulu pulu keru tengema kulu tonjimbe mele Pulu Yemo popo toko singí melte paa naa lemo. <sub>1</sub>Ungu sikemo pilku likulie altoko munduku kelemelemonga, ‘Pulu Yemonga kote walemo wendo ombá kinie tepe paa aili nomba pelemomone yunge opa touma nombá kinie olio pea nombá.’ ningu pilku pipili kolko mindi molonge akumunge ‘Maku toko anju yando enenga yamboma ‘Konopu tondolo pupili.’ niei.’ nikiru.

28 Yambo tene Mosisini ungu mane sirimuma ‘Naa pilipu tembo.’ nimbe pulue torumu kinie ye talone molo yepokone kanoko ningu siringi



kinie yu kondo naa kolko sumbi siku kamu toko konjiringi.

<sup>29</sup> „Ou aku sike teko kenjiringi yamboma aku siku mindili siringi, liemo ‘yambo tene Pulu Yemonga Malo\* ‘Yu uluri molo.’ nimbe mundupe kelepa „ungu taka tonjipe, Pulu Yemone ungu konde nimbe panjipe mi lerimu ungumu Kirasinge mememone tondolo mundunjirimu aku mememone kanu yambomo ‘Pulu Yemonga yambo konopu kake telimu molopili.’ nirimu aku mememo ‘uluri molo’ nimbe ungu taka tonjipe, Pulu Yemone olio konopu monjipe lipe taponjilimo mele lipe ora silimo Mini Kake Telimu\*\* ungu taka tonjilimo aku yambomo papu olandopa mindili nombá molo molo.’ konopu lekemeleye?

<sup>30</sup> Aku nikirumunge ungu talo i sipe bokuna molemo:

Te: “Teko kenjilimelemenga pundu toli kongonomo

nanga kongonomo.

Nanu mindi pundu topo ene mindili simbu.

„Yambo te lupene aku naa temba.”

nimbe aku ungumu molemo.\*

Te: “Ailimuni yunge yambomanga kotemo yuyu tenjipe pilimbe.”

nimbe aku ungumu molemola.\*\* Aku ungotolo nirimu „Pulu Yemo olio pilipulie ‘aku siku yunge Malo kinie Malonga mememo kinie Mini Kake Telimu kinie teko kenjingi yamboma sike paa mindili nonge.’ nimbu pilimolo.”

<sup>31</sup> Konde molopa mindi puli Pulu Ye paa tondolo puli olandopamone yambo tendo mumindili

kolopalie ‘Mindili nani.’ nimbé liemo papu yu paa mini wale mundumbe. ‘Aku kene maku topo anju yando yamboma ‘konopu tondolo pupili.’ niemili.’\*

<sup>32</sup> Ene ou Pulu Yemonga ungumu pulu pulu pilkulie pilku liringi kinie teringi mele altoko piliei. Ene mindili siringi kinie we mindili nongo tondolo munduku molko Pulu Yemo munduku naa keleringi.

<sup>33</sup> Wale mare ene liku yambomanga kumbik-erena anjiku ene ungu taka tonjiku ‘mindili nangi.’ niringi. Wale mare aku siku mindili noringi yamboma ene kinie tapu toko molko liku taponjiringila.

<sup>34</sup> Ka siringi ka ulkena peringi yamboma enene kondo koloringi. ‘Enenga mele paa peanga alieli lepa mindi pumbe melema we lemo.’ ningu pilkulie ‘Molko kenjengi!’ ningu enenga mana melema liringi kinie ‘We liengi.’ ningu we siye kolko konopu siringi. Aku siku teringi walema altoko konopu liku munduku piliei!

<sup>35</sup> Ou aku siku teringi mele altoko pilkulie ‘Sike lipe taponjilimo. Sike aku sipu molomolo.’ ningu tondolo munduku piliringi mele kinié munduku naa keleangi. Tondolo munduku pilku molonge kinie akumunge mele kaloli peangama ene aili teko lingí.

<sup>36</sup> ‘Pulu Yemone olio “Teai.” nilimo mele temolo kinie yuni “Simbu.” nimbe panjirimu mele peangama limulú.’ ningu pilkulie tondolo munduku pilimele mele munduku naa kelko, teko mindi molangi. Munduku kelenge kinie naa lingí.

37 Ungu te pilipulie aku sipu nikiru. Aku ungumu i sipe:

‘Wale layetolo mindi omba pumbe kinie  
“Ombó.” nirimu yemo sike ombá.\*

Yu walsikale lkisipe ombá.

38 “Nane ‘yambo sumbi nilime’ nimbu kanolio yamboma nane nimbu molio mele ‘Sike.’ ningu tondolo munduku pilimelemonga konde molko konjiku mindi pungí.

Nakolo ningu tondolo munduku pilimele mele munduku kelengi liemo na ene kinie konopu naa simbu.”.\* nirimu.’ nimbe aku sipe molemo.

39 Nakolo olio yambo ningu tondolo munduku pilimele mele munduku kelkolie kolea kerine pulimele yambomanga yamboma naa molemolo. Olio ‘Sike.’ nimbu tondolo mundupu pilimolo yamboma Pulu Yemone lipe taponjipe, mindili nolemelka aulkena wendo lipe, ‘yu kinie pea molko konjingí aulkena pangi.’ nilimo yamboma molemolo.

## 11

1 „Pulu Yemo ‘Sike.’ nimbu tondolo mundupu pilimolo.”, nikiru\* aku tondolo mundupe pililimunge ungu pulumu i sipe: Pulu Yemone olio “Simbu.” nimbe panjirimu melema ‘Paa sike limulú.’ nimbu tondolo mundupu pilipu nokopo molemolo. Melema mongone naa kanolemolo nakolo ‘Mele akuma paa sike lemo.’ nimbu tondolo mundupu pilimolo.\*\*

2 Yambo ou moloringimene aku siku ningu tondolo munduku piliringimunge Pulu Yemone

ene kanopa peanga kanopalie ‘Teko konjikimili.’  
nirimu.

<sup>3</sup> Pulu Yemone nilimo mele olio ‘Sike.’  
nimbu tondolo mundupu pilimolomonga 1Mo-  
sisini bokuna torumu mele pilipulie,<sup>1</sup>\* ‘Pulu  
Yemone mulu kinie ma kinie tembando “Wendo  
opili.” nirimu kinie ungumuni mulu matolo  
wendo orumu.’ nimbu pilimolo. ‘Akumunge  
mele naa lerimu melemane Pulu Yemone olio  
kanolemolo melema sike terimu.’ nimbu pil-  
imolo.

<sup>4</sup> Epelene Pulu Yemone nirimu mele ‘Sike.’  
nimbe tondolo mundupe pilipe molorumu-  
munge Pulu Yemone kanopa peanga kanorumu  
mele te Pulu Yemo popo topa kalopa sirimu  
nakolo Kénene Pulu Yemo popo topa kalopa  
sirimu melema Pulu Yemone kanopa keru kano-  
rumu.\* Epelene Pulu Yemo ‘Sike.’ nimbe tondolo  
mundupe pilirimumunge Pulu Yemone ‘Epele  
ye sumbi nilimu’ nimbe kanorumu. Yuni Pulu  
Yemo popo topa kalopa sirimu melema Pulu  
Yemone konopu monjipelie “Papu tekono.” nir-  
imu. Aku ulumuni Pulu Yemone ‘Epele ye  
sumbi nilimu’ nimbe kanorumu mele olio lipe  
ora sirimu. Epele ou kolorumu nakolo 1yunge  
temanemo bokuna molemona, yuni Pulu Yemo  
‘Sike.’ nimbe tondolo mundupe pilirimumunge  
olio kinié 1Pulu Yemo kapola popo tomolo mele,  
ungu we nimbe silimo.

<sup>5</sup> Inokene Pulu Yemone nirimu mele ‘Sike.’  
nimbe tondolo mundupe pilipe molorumu-  
munge naa kolorumu. Yu konde molopili Pulu  
Yemone yu lipe memba purumu.\* Pulu Yemone  
yu lipe memba purumuna yambomane yu naa

kanoko liringi. Pulu Yemone Inoke lipe memba naa pupili Inokene Pulu Yemo kanopa peanga kanorumu uluma terimumunge Pulu Yemone aku terimu.

<sup>6</sup> Yambo tene 'Pulu Yemo popo topo kapi niembo kene yu molemona nondopo pambo.' nimbélie, 'Pulu Yemo sike molemo. Yu molemona pupu "Teko konjiku liku taponji." nimbú kinie sike tepa konjipe lipe taponjimbe.' nimbe tondolo mundupe pilipelie yunge kumbikerena manda pumbe. Aku sipe naa nimbe pilimu liemo paa manda naa pumbe. Akumunge Pulu Yemone nilimo mele 'Sike.' nimbe tondolo mundupe naa pilipelie Pulu Yemone kanopa peanga kanomba ulu mare paa manda naa temba.

<sup>7</sup> Noane Pulu Yemone nirimu mele 'Sike.' nimbe tondolo mundupe pilipe molorumumunge Pulu Yemone yundu " 'Mana umbuni te wendo opili.' nimbú tekero." nirimu kinie\* pilipelie, Noane 'Sike nikimu.' nimbe ,Pulu Yemone "Tei." nirimu mele pilipe manda lepa, nona lembe sipi aili te tepa mimi terimu. Pulu Yemone "tembo" nirimu mele sike ou walsikale kepe yambomane naa kanoringi nakolo Noane 'Sike nikimu.' nimbe pilipelie sipi te tepa mimi terimu. Aku terimumunge no torumu kinie yu kinie yunge yamboma kinie kapola moloringi\*\* nakolo we yamboma kinie melema pali none torumu. Yuni Pulu Yemone nirimu mele 'Sike.' nimbe tondolo mundupe pilipelie ,terimu, ulumuni Pulu Yemone yamboma kanopa keru kanopalie tomba terimumu yamboma lipe ora sirimu. Aku sipe nimbe pilir-

imumunge Pulu Yemone ‘yu ye sumbi nilimu’ nimbe kanorumula.\*\*\*

8 Eporayamone Pulu Yemone nirimu mele ‘Sike.’ nimbe tondolo mundupe pilipe molorumunge Pulu Yemone yundu “Nu moleno koleamo munduku kelko pe simbu koleana pui.” nirimu kinie pilipelie kanu koleamo suluna lerimumunge ou naa kanorumu nakolo ungumu pilipe lippe tenge panjipe we walu purumu.\*

9 Pulu Yemone nirimu mele ‘Sike.’ nimbe tondolo mundupe pilirimumunge Pulu Yemone “Simbu.” nimbe panjirimu koleana pupelie ye omba angilili akuna kamu perimu. Sike ulke te kamu naa takopa, sele ulke te takopa pelipe aku koleana andorumu. Pe anjupe Pulu Yemone Eporayamondo “Simbu.” nirimu koleamo Eporayamo yunge malo Aisake kinie Aisake yunge malo Jekopo kinie eltendo aku sipela nirimuna pilkululie elte kepe ,eltenga yamboma kinie, sele ulke takoko peringi.\*

10 ‘Pulu Yemone yuyu pilipelie kolea aili tenga kamu angilimbe ulkema takopa pora sirimu koleana pe walse kamu pembo.’ nimbe pilipelie Eporayamone ‘Isili ou sele ulkena pembo kinie mandala. Uluri molo.’ nimbelle sele ulkena perimu.

11 Eporayamo ambolango membá\* poniema pora nirimu,\*\* yunge ambo Sera wayongono perimu, nakolo Pulu Yemone nirimu mele ‘Sike.’ ningu tondolo munduku pilkulu moloringilimumunge Pulu Yemone elte tondolo sirimu kinie ambolango meringili.\*\*\* ‘Pulu Yemone “Tembo.” nimbe panjilimo mele sike

telemo. Kolo naa tolemo.’ ningu pilkululie meringili.

<sup>12</sup> Akumunge ye te anda lepa ye kololi mele molorumu yemo yambo paa aisilinge anda kolepamo molorumu. Yambo kombukandipi mele molo kou okiya mele kambu paa manda naa tonge yamboma yuni kalopa lirimu.

<sup>13</sup> Kanu yemane\* Pulu Yemo ‘Sike.’ ningu tondolo munduku pilku mololiku pukulie koloringi. Ene ma koleana ou we molkolie Pulu Yemone “Simbu.” nimbe panjirimu melema ou naa liringi. ‘Pe sike limulú.’ ningu konopuni piliringi akumu suluna mele lerimuna mongone mele kanokolie ‘Likimulu.’ ningu konopu siku molkolie yambo moloringi kinie pipili naa kolko “Olio ya ma koleana yambo ponenge lepo ombo angilimolo.” niringi.

<sup>14</sup> Yambomane aku siku nilimele kinie pilipulie ‘Enenga kamu molonge kolea te koroko kanoko lingíndu nilimele.’ nimbu pilimolo kanumu, akumunge , ‘kanu yema aku siku ningu piliringi.’ nimbu pilimolo,.

<sup>15</sup> Kolea munduku kelko oringi koleana ‘kelepo pumulú.’ ningu pilimelkanje ene kelko manda pulimelka.

<sup>16</sup> Nakolo molko oringi kolea akumu altoko konopu kimbu siku naa molkolie ‘kolea paa peanga olandopa te lupe akuna familiya.’ ningu piliringi. Aku koleamo mulu koleamo. Akumunge Pulu Yemone ‘, ‘yu sike’ ningu tondolo munduku pilimele, yamboma akuna molangi.’ nimbe kolea aili ,peanga te, tepa mimi terimumunge kolea Kenane yamboma kanu yemane

enenga Pulu Yemo molopa telemo mele ningu siringi kinie Pulu Yemo yu pipili naa kolorumu.

17-18 Pulu Yemone ‘Eporayamone “Tei.” nimbú mele sike pilipe lipe tembanje kanambo.’ nimbe manda lerimu kinie Eporayamone ‘Pulu Yemone “Tembo.” nirimu mele sike temba.’ nimbe tondolo mundupe pilipelie yunge malo Aisake Pulu Yemo popo topa kalopa simbe terimu. Sike ou Pulu Yemone Eporayamondo nimbe panjipelie nimbendo: “Nunge malo Aisakene kalopa limbe yamboma mindi “Nuni kalko lini.” nimbu, nimbu panjirindu yamboma molonge.” nirimu\* nakolo aku pilipe ‘Sike nikimu. Sike aku sipe temba.’ nimbe pilipelie yunge malo telu mindi molorumumu aku sipe temba terimu. ıEporayamone Aisake kalomba terimu kinie Pulu Yemone “Molo!” naa nilkenje sike kamu topa kalka,ı.

19 Eporayamone konopuni pilipelie, ‘Aisake kolomba kinie Pulu Yemone ‘yu lomboropa ola moloi.’ nimbé kinie manda konde molomba.’ nimbe pilirimu. ıEporayamone ‘Aisake konde molopili manda ulkendo membo pumbu.’ nimbe pilirimu. ıPulu Yemone ou “Nu kinie malo Aisake kinie tembo.” nimbe panjirimu mele ‘Sike temba.’ nimbe pilipe malo konopu talo naa kimbu sipe topa kalomba terimu,ı kinie Pulu Yemone “Molo!” nirimumunge yunge kangomo kolopa leli none terimu akumu kelepa konde molopili lirimu.

20 Aisakene Pulu Yemone nirimu mele ‘Sike.’ nimbe tondolo mundupe pilipe molorumu-munge yu kolombando malo ıakilio,ı Jekopo



kinie malo ɿkomo, Isotolo ungu peanga tondolo te nimbe sipelie pe Pulu Yemone nokomba kinie teko molongele mele ou nimbe sirimu.\*

21 Jekopone Pulu Yemone nirimu mele ‘Sike.’ nimbe tondolo mundupe pilipe molorumumunge yu paa anda lepa apulu ambolopa andorumumu ambolopa pi polopa ma kanopa Pulu Yemo kapi nimbe imbi ambolopa ola linjirimu.\* Kolomba tepalie yunge malo ɿkonopu monjirimu, Joseponga kango ɿakiliomo kinie komomo, tolo ungu peanga tondolo te nimbe ɿsipelie pe Pulu Yemone elte nokomba kinie teko molongele mele nimbe, sirimu.\*\*

22 Josepone Pulu Yemone nirimu mele ‘Sike.’ nimbe tondolo mundupe pilipe molorumumunge Josepo yu nondopa kolomba tepalie yunge Isirele yambomando\* nimbendo: “ɿYa kolea Isipi kamu naa molonge. Pulu Yemone “Simbu.” nirimu koleamo sike pe walse kamu simbe akuna sike kamu puku molonge kene ene pe kolea Isipi munduku kelko Pulu Yemone “Simbu.” nirimu koleana pungí tekolie nanga onomo ya naa lepili, mengo puku aku koleana kamu ono teangi.” nirimu.\*\*

23 Mosisinge anumu lapatolone Pulu Yemone nirimu mele ‘Sike.’ ningu tondolo munduku pilkulu moloringilimunge Mosisi mengololie yu oli yepoko lopi teringili. ‘Yu kango paa peanga.’ ningu kanokolo ‘Pulu Yemone lipe taponjimbe kango te lémo.’ ningu kanokololie Isipi ye nomi kingimuni yunge Isipi yamboma kinie ungu mane sipe panjipelie “Ipuru yamboma kango mengema pali toko konjengi.” nirimu mele

pulue tongelendo pipili naa kolkololie kangomo oli yepoko lopi teringili.\*

<sup>24</sup> ɽPe Isipi ye nomi kingimunge lemenuni Mosisi nona kanopa lipe ‘Nanga kangomo’ nimbe nokorumu nakolo Mosisi yu Isipi ye nomi kingimunge ulkena molopa ai lepalie, Pulu Yemone nirimu mele ‘Sike.’ nimbe tondolo mundupe pilipelie “Na ɽPulu Yemonga Isirele yambomanga ye te molio akumunge na, Isipi ye nomi kingimunge lemenunge malo na naa molombo.” nirimu.

<sup>25</sup> ɽIsipi ye nomi kingimunge ulkena, konopu siku ulu pulu kerime teringi mele ‘wale mare pea teamili.’ nimbe naa pilipelie ‘Pulu Yemonga yamboma umbuni melemele mele aku sipu meambo.’ nimbe pilirimu.\*

<sup>26</sup> Yuni konopuni pilipelie ‘Isipi koleana mele aisili aisili peangama nanga nosilkenje uluri molo.’ nimbe pilipelie ‘Pulu Yemone “mele peanga simbu.” nirimu melema pe limbu.’ nimbe pilipelie, ‘Pulu Yemone “ ‘Nanga yamboma nokopa konjimbe.’ nimbu lipu mundumbu.” nimbe mako torumu ye nomi Kirasimu mindili singi nombá mele\* na aku sipu mindili nombó kinie paa peanga.’ nimbe pilipe molorumu.

<sup>27</sup> Mosisi Isipi mundupe kelepa purumu kinie Isipi ye nomi kingimuni yu kinie mumindili kolumumunge pipili kolopa kowa naa purumu. Pulu Yemone nirimu mele ‘Sike.’ nimbe tondolo mundupe pilipe molorumumunge yu Isipi mundupe kelepa ɽkolea ku leline, purumu.\* Yambomane mongone naa kanolemele yemo

konopuni mele kanopalie yu Pulu Yemone ‘Tei.’ nirimu mele pilipe tembando siye naa kolopa tondolo mundupe terimu.

28 ɿsirele yamboma Isipi moloringi kinie, Pulu Yemone Mosisindu nirimu mele Mosisini ‘Sike nikimu. Sike aku temba.’ nimbe tondolo mundupe pilipelie yuni Isirele yambomando nimbendo: “Pulu Yemonga angellomone enenga kango komolayema kinie kongimenga komolayema kinie ‘naa topili.’ ningu kongi sipisipi molo meme walo mare tokolie memema kolko ulke kerepulumanga ape kanjinjengi. Naa tenge kinie komolayema sike tomba.” nirimu. Pe yunge ungumu pilku likulie teringi kinie Pulu Yemonga angellomone enenga komolayema sike naa torumu.\*

29 Isirele yambomane ‘Pulu Yemone “Tembo.” nirimu mele sike temba.’ ningu tondolo munduku pilku moloringimunge Nomu Kondoli kumbulupe mamu we lerimu kinie nekendo puringi. Nakolo Isipi yemane Isirele yamboma tongendo akiliku lombili puringi kinie nomo kelepa omba nunumu sipe ene lipe aki torumu kinie no wangoko koloringi.\*

30 Jeriko taono ɿ‘yamboma enenga opa tuma naa wangi.’ ningu, kou pala paa aili tondolo te teringi nakolo Isirele yambomane ɿkokele kolea Kenane sukundu puku Jeriko lerimuna pukulie, ‘Pulu Yemone “Tembo.” nirimu mele sike temba.’ ningu tondolo munduku pilkulie, palana makaye teko puku molangi wale yepoko pakara omba purumu kinie yepoko pakara akumunge kou pala kanuma kalalu nirimu.\*

31 Wapora ambo Reyapo Pulu Yemone nirimu mele 'Sike.' nimbe tondolo mundupe pilipe molorumumunge Isirele ye talone 'Jeriko yamboma nambe telemelenje?' ningulu kanoko panjingili oringili kinie yuni elte lipe taponjipe "Nanga ulkena sukundu wangili." nimbe lipe lopi tepa monjirimumunge Isirele yambomane 'Jeriko,' yambo Pulu Yemonga ungu naa pilku liringi yamboma ongo toringi kinie yu naa toringi.\*

32 Pulu Yemone nirimu mele 'Sike.' ningu tondolo munduku pilku moloringimunge Pulu Yemone yu 'Sike.' ningu tondolo munduku piliringi yambo kanuma lipe taponjirimu yambo marenga temanema pea tamboye? Tolkanje ena we pora nilke. 'Olionga anda kolepali,' Gidiono keme, Barake keme, Samisono keme, Jepita keme, Depisi keme, Samuele keme,\* Pulu Yemone ungu umbu tonjirimuma pilku yamboma ningu siringi yema\*\* ene kinie temane mare topo silke nakolo aku temanema topo simbu ena te naa lekemo.

33 Pulu Yemone nirimu mele 'Sike.' ningu tondolo munduku pilku moloringimunge olionga anda kolepali marene ye nomi kingi marenga ami yema kinie opa tekolie enene nokoringi koleama toko kaloringi. Marene 'Yamboma molko konjengi.' ningu ulu sumbi nilime teko nokoringi. Marene Pulu Yemone "Ene tepo konjimbun." nimbe panjirimu mele ene molangi sike wendo orumula. Marene 'Lopa posi llayonone olio naa nomba konjipili.' ningu kerema pipi siringi.\*

34 ɿPulu Yemone nirimu mele ‘Sike.’ ningu tondolo munduku pilku moloringimunge yuni ene lipe taponjirimuna, marene tepe aili tepa norumumu ‘Naa nopili.’ niringi.\* Marene ‘Opa teli lou pulsene naa tangi.’ ningu kowa puringi.\*\* Mare ou enge te naa perimu nakolo pe enge pepili moloringi.\*\*\* Mare opa tengendo paa ye enge nilime molko, enenga opa tou ami yema toko munduringila.\*\*\*\*

35 ɿPulu Yemone nirimu mele ‘Sike.’ ningu tondolo munduku pilku moloringimunge, yambo mare koloringime kelko lomboroko ola moloringi kinie anupilini ɿene konde moloringi kinie, kelko liringila.\*

Nakolo mare ka siku ‘Mindili nongo kolangi.’ ningu kopene tokolie ningindu: “Enene ‘Pulu Yemonga ungumu mundupu kelemolo.’ ningi kinie ‘We pangi.’ nimulú.” niringi kinie ‘Kolomulu liemo kelepo lomboropo ola molopo, kamu paa konde molopo konjipu mindi pumulú.’ konopu lelkolie enenga opa toumane niringi mele naa piliringimunge toko konjiringi.

36 Mare ungu taka tonjiku ka pulsene tondolo toko, mare ka senene ka toko ka ulkena panjiringila.

37 ɿPulu Yemone nirimu mele ‘Sike.’ ningu tondolo munduku pilku moloringi yambo, mare ‘Kolangi.’ ningu kouni toringi; mare ɿkonde molangi, so liku suku singine kolomongo teringi;\* mare opa teli lou pulsene toko konjiringila.\*\* Mare mulu wambale molo torumu kinie kongi sipisipi molo mememanga kangime liku panjiringila. Melema molo topa paa koropa

pupili moloringila. Mare mindili noringi. Mare yambomane teko kenjiringi.

38 Mare kolea ku lelimenga kinie, ma pangimenga kinie, kou kandemanga kinie, ma angamanga kinie, puku peliku andoringi. Kanu yamboma mindili siringi nakolo Pulu Yemo 'Sike' ningu tondolo munduku pilku moloringi akumunge mana we moloringi yamboma kinie, kanu yamboma kinie, pea teluna papu naa moloringi. We yambomane ,Pulu Yemone nirimu mele 'Sike.' ningu tondolo munduku piliringi, yambo kanuma 'yambo kerime' ningulie toko makoringi nakolo kanu yamboma kinie we yamboma kinie telu sipe molo. Ene Pulu Yemonga ungumu pilku moloringi, we yamboma naa piliringimunge ene we yamboma kinie pea teluna papu naa moloringi.

39 Ya nikiru yambomane pali 'Pulu Yemone "Tembo." nirimu mele sike temba.' ningu tondolo munduku pilku moloringimunge Pulu Yemone ene kanopa peanga kanorumu mele 'Piliengi!' nimbe lipe ora sirimu. Aku sike nakolo ma koleana molkolie Pulu Yemone "Simbu." nimbe panjirimu melema naa liringi.\*

40 Pulu Yemone mele olandopa olandopa terimuma yuni nimbe panjipe mi lerimu ungu oumu\* pepili moloringi yamboma kinie, pe kinié nimbe panjipe mi lerimu ungu kondemo\* pepili molemolo yamboma kinie, 'pea pali walsikale simbu.' nirimumunge ene ou naa liringi.\*\*

## 12

<sup>1</sup> Ou yambo paa aisili aku siku Pulu Yemone nirimu mele 'Sike' ningu tondolo munduku pilkulie\* teko konjiku moloringimunge aku sipu olio tepo konjimulú mele liku ora silimele kene kanopo pilipulie pe kinié olio kepe aku sipu mele peangama limulundu Pulu Yemone owe te mako torumu owemonga 'Lkisiku pangi.' nirimuna pilipulie 'Paa lkisemili.' nimbu olio lipe naa taponjilimo ulu lupe lupema mundupu kelepo, ulu pulu kerime kepe 'Olio naa ambolopa pipi naa sipili.' nimbu siye naa kolopo konopu tondolo pupili keru kuru lipu lkisemili.\*\*

<sup>2</sup> ıTondolo mundupu lkisimulundu, olio tondolo mundupu pilimolo ulu pulumunge pulu ye Yesusi\* mimi sipu kanolipu\*\* pamili. 'Tondolo mundupu pilipu, tepo konjipu, siye naa kololipu pumulú ulu pulumu yula.' nimbu yu ıtepa molorumu mele kinie molemo mele kinie nilimo mele kinie 'Sike.' nimbu tondolo mundupu pilimolo mele, siye naa kolopo pilipu pamili. Yuni terimu mele manda lepo teamili. Yu pilipelie, 'Pulu Yemone "Tei." nilimo mele tepo konjimbu kinie paa konopu sipu molopo konjimbu.' nimbelie yu mindili nomba unju perana kolorumu. We yambomane unju perana kolemele yamboma 'yambo kerime' nilimele\*\*\* nakolo Yesusi unju perana uku toko panjingimunge pipili naa kolopa konopu aisili lipe naa mundupelie akuna angilipe kolorumumunge kinié ımelema pali nokombando, Pulu Yemo kolea nokopa molemo polomonga ki umbukundu yu pupe molemo.\*\*\*\*

<sup>3</sup> 'Olio siye naa tepili.' ningu Yesusi terimu

mele mimi siku pilieyo. Ulu pulu keru teli yambomane Yesusi kinie mumindili kolko mindili siringi kinie yu tondolo mundupe molorumu mele mimi siku pilku molayo. Yu aku siku teringi kinie molorumu mele ningu kanokolie ene sike konopu tondolo pupili molko, mini wale naa munduku tondolo munduku pilimele mele munduku naa kelenge.

<sup>4</sup> Ene sike ulu pulu kerime teli yambomane ‘mindili nangi.’ ningu ene teko kenjilimele kinie tondolo munduku molemele nakolo telemele ulumuni enenga yambo te ou topa naa konjirimu kanumu.

<sup>5-6</sup> Pulu Yemonga bokuna molemo, ungu tene ‘ene tondolo munduku molangi.’ nimbe ene ‘yunge ambolangoma’.\* nimbelle enendo nirimu ungumu komu síngi lemo. Aku ungumuni nimbendo:

“Nanga ambolangomo,

Ailimuni yambo konopu monjilimoma

‘Molko konjengi.’ nimbe mindili silimo.

‘Yunge ambolangoma molangi.’ nilimo yambo akuma

kopene tolemola. Akumunge

Ailimuni ‘Nanga ungumu pilipili.’ nimbullie

mindili simbu kinie ‘Akumu uluri molo.’ naa ningu,

yuni nu iri topa mane simbe kinie

umbuni aisili naa kolani.”.\*\*

nirimu.

<sup>7</sup> ‘Pulu Yemo olionga Lapamone ‘olio yunge ambolangoma.’ nimbe aku telemo.’ ningullie mindili nonge molo umbuni te ene kinie wendo ombá kinie ‘Pulu Yemone ‘yunge ungumu pilku



teangi.' nimbe tekemo.' ningu tondolo munduku molangi. Ambolango te yunge lapane mane naa silimo ambolango te molemoye? «Molo.»

<sup>8</sup> (Ambolangoma pali enenga lapalini 'Molko konjengi.' ningu kopene toko mane silimele) akumunge Pulu Yemone ene 'Molko konjengi.' nimbe mindili naa simu liemo ene wakangoma molemele, yunge ambolango sikema naa molemele.

<sup>9</sup> Imu piliengila: Olio ambolangoma molorumulu kinie olionga ya mana lapalini 'Molko konjengi.' ningu mindili siku mane siringi kinie olione enenga unguma lipu ai sipu taka lepo molopo 'Papu tekemele.' nimbu molorumulu. Aku liemo olionga minime kinie konopuma kinie nokolemo Lapamone olio mane silimo kinie 'Alieli konde molopo konjipu mindi pamili.' nimbulie yunge ungumu paa olandopa pilipu lipu taka lepo molomulu liemo papula.

<sup>10</sup> Wale laye kolo mele olionga lapalini olio 'Molko konjengi.' ningulie eneno konopuni pilkulie mindili siku mane siringi, nakolo Pulu Yemone pilipe konjipe olio sumbi sipe mane silimo akumuni olio alieli paa lipe taponjilimo. Yu kake telemo mele olio 'aku sipe kake tepili.' nimbelle aku telemo.\*

<sup>11</sup> Olionga lapalini 'Molko konjengi.' ningulie olio mindili silimele kinie konopu naa sipu molemolo. Mindili nombolie konopu keru mindi panjipu molemolo. Nakolo ou mane silimele kinie pilipu lipulie pe ulu sumbi nilime tepo konopu pe nipili taka lepo molemolo.

<sup>12</sup> Akumunge,\* yamboma keru kuru liku lk-

isilimele kinie\*\* enenga kime enge naa nimbe pange tepa maniendo sipe we lemo kinie ola liku enge nipili we lkisiku, enenga koporongoma limo kinie munduku naa kelko tondolo munduku we lkisilimele mele ene aku siku teangi. Kangi molo konopu pange temba kinie tondolo pupili ola angilku kongono siye naa kolko tondolo munduku teangi.

13 'Kimbu keru lemo yamboma enenga kimbuma kamu keru naa lepili. Altopa peanga lepili.' ningulie aulke sumbi niline pangi.\*

14 Yamboma kinie konopu teluna pupili taka lelko molko konjingi uluma tondolo munduku teko molko,\* enenga konopuma kinie kangime pali 'Pulu Yemonga' ningu Pulu Yemone kanopa 'kake telemo' nimbe kanolemo uluma tondolo munduku teko molangi.\*\* Aku naa tenge kinie Ailimu naa kanonge kene aku teai.

15 Ene mimi siku kanoko molonge mele i sipe: Pulu Yemone ene we kondo kolopale lipetaponjirimu aulkemo ene yambo te mundupe kelemba kene mimi siku kanoko molai.\* Unju te mongo kombili telime tolemo aku mongomanga te liku langi kalemelena suku mundulimele kinie langime pali kombili telemo,\*\* aku sipe mele enenga yambo te molopa kenjimbe kinie ene pali yu manda manjiku teko umbuni ene kinie pepili molko Pulu Yemone 'ene kalari molopili molemele' nimbe kanomba kene mimi siku kanoko molangila.\*\*\*

16 Wa ulu kerinele naa teko, Pulu Yemone 'Ambo yema kangikundu ulu teangi.' nirimu mele mindi pilku teko molangi. Ou Isona Pulu

Yemo bulu sirimu mele aku siku naa teangila. Iso yu komomo molopalie lapane monge mele simbema 'uluri molo' nimbe angenuni langi te 'nopili.' nimbe sirimu kinie ,engelene kolopa langi lipe nombando, lapane monge mele simbe terimuma pali angenundu 'Lieni!' nirimu\* mele aku siku enene Pulu Yemo bulu siku aku naa teai.

<sup>17</sup> 'Yu sike Pulu Yemo bulu sirimu.' nimbu pilimolo mele i sipe: Pe Iso lapa Aisakene kango akilio Jekopo monge melema kamu sirimu kinie yu 'paa liemboa.' nirimu kinie ,Pulu Yemone, "Molo!" nirimu. Yuni lapando "Na molombo mele ungu peanga te ningu si." nimbe mawa tepa kola terimu nakolo ou tepa kenjirimu mele mundupe kelepa altopa ulu peanga te temba aulke te naa lerimu\* kanumu. ,Akumu pilkulie ungu pulumu mimi siku piliei.,

<sup>18</sup> , 'Ene mimi siku kanai.' nikirumunge ungu pulu te i nikirula:, Ene ,mulú, tenga oringi molemele mulúmu kinie ou Isirele yamboma nondoko moloringi ,mulú Sainai, kinie lupe lupe. Ene kinié molemele mulú kanumu ,mongone kanoko, kini ambolonge aulke te naa lemo. Isirele yamboma nondoko moloringi mulú Sainai akuna kuli tepe mele aili tepa nomba, kupe pombera toli aili tene aki topa, ikilie paa aili tepa tepa, sumbulu paa aili tepa topa, poporome tondolo mundupe topa, kariapá tepa, mulu torumu mele kanoko pilku moloringi.\*

<sup>19</sup> Akuna biyukele te ungu paa tondolo mundupe nimbe, yambo tene ungu tondolo mundupe nirimu pilkulie yamboma mini wale munduku Mosisindu ningindu: " ,Pulu Yemone,

oliondo altopa ɿsumbi sipe, naa nipili.” niringi.\*

<sup>20</sup> Ungu pilkulie mini wale munduringi akumu i sipe: “ɿYambo te molo, kongi te kepe muluna nondopa pupe olando pumbe temba kinie kouni toko konjengi.”\* nirimumunge pilkulie mini wale munduku aku siku Mosisindu niringi.

<sup>21</sup> Ulu mare wendo orumu kanokolie mini wale munduringi uluma Mosisi yu pilipe kanopalie “Na kepe mini wale mundupu pungu pungu nikiru.” nirimu.\*

<sup>22</sup> ɿIsirele yamboma aku mulúna puringi, nakolo ene ɿpepá topo sikiru yamboma Pulu Yemone pe nimbe panjipe mi lerimu ungu kondemo pepili molemele yamboma\* ene Pulu Yemo molomu, mulú Sainai none teli mulú tenga naa ongi molemele. Ene ɿPulu Yemo molemo, mulú Sayono ongi molemele. Akumu kolea aili Jerusalleme. Aku kolea ailimu konde molopa mindi puli Pulu Ye tondolo pulimu molemo kolea mulu koleana lemo koleamo. Angello kambu manda naa tolime konopu siku maku toko molemelena ene ongila.

<sup>23</sup> Akuna Pulu Yemonga yamboma, enendo “Nanga ambolango komomo.” nilimo\* yamboma molemelena oringila, kanu yambomanga imbime mulu koleana boku tenga molemo yamboma. Yambomanga pali kote pilipe apuruli Pulu Yemo molemona oringila. ɿYesusi kolonjirimumunge, Pulu Yemone kanopa ‘yambo sumbi nilime’ nimbe kanorumu yamboma koloringi kinie ‘mulu koleana kapola wangi.’ nirimuna puringi molemelena oringila.

<sup>24</sup> Ungu kondemo ‘kamu wendo opili.’ nimbe

terimu ye Yesusi molemona oringi molemelela. 'Olionga ulu pulu kerime kinie kalaroma pali kamu manie pupili.' nimbe akuna memba pupe tanda sirimu meme molemo koleana ongila. Aku mememo kinie ou Kénene 'Epele kolopili.' nimbe Epele torumu kinie yunge mememo\* omba purumu memetolone ungu niringilitolo telu sipe mele molo. Akumunge memetolo kepe telu sipe mele molola. Yesusinge mememone ungu nilimo akumu olandopa, akumunge yunge mememo olandopala. Aku mememo molemo koleana oringi.

<sup>25</sup> ɿAkumunge ene kanai!, Ungu nilimo yemonga ungu mu paa mimi siku pilku molangi. Pulu Yemone ou ya ma koleana ɿmulú Sainai molopalie, olionga anda kolepalime ungu tondolo mare nimbe sipe lepi lepi torumu kinie 'Naa pilimulú.' niringi kinie teko kenjiringimunge umbuni sirimu kinie ene kowa pungí aulke te naa lerimu. ɿMana moloringimunge aku sipe liemo, kinié Pulu Yemone mulu koleana molopalie ungu tondoloma oliondo yando nimbe sipe lepi lepi tolemo kinie 'Naa pilimulú.' nimbu bulu símulu liemo mindili simbe kinie kowa pumulú aulke te lembaye? Paa naa lemba.

<sup>26</sup> Ou ɿIsirele yamboma mulú Sainai moloringi kinie Pulu Yemone, ungu nirimu ungu mu ma lope lope tenjirimu, nakolo kinié yuni ungu te nimbe panjipelie nimbendo:

"Altopo walsikale kamu 'lope lope tepili.' nimbú akumu mamondo mindi naa nimbú. 'Mamo kinie mulúmu kinie pea jimi jimi tepili.' nimbú kinie temba.".\*

nirimu.

<sup>27</sup> Yuni “altopo walsikale kamu ‘tepili.’ nimbú.” nirimu akumu i sipe nimbé nirimu: ‘ ‘Mulúmu kinie mamó kinie mele terindumanga we lepa mindi pumbe melema we lepili, pora nimbé melema pora nipili.’ nimbe melema pali lope lope tenjimbe kinie we lepa mindi pumbe melema mindi lope lope naa teli we lemba.’ aku sipe Pulu Yemone nirimu.

<sup>28-29</sup> Pe kinie ye nomi kingimuni nokolemo koleamo\* jimi jimi tepa pora naa nimbé\*\* koleana pulimolomonga ₁Pulu Yemo kinie, ‘Ange.’ niemili.

“Tepene melema nomba pora silimo mele.”

olionga “Pulu Yemo tepe mélemo molemo.”.\*\*\* akumunge Pulu Yemo popo topo imbi ambolopo ola linjipu kapi nimulundu yuni kanopa peanga kanolemo uluma tepo pipili kolopo ‘Yu ye paa aili olandopa tondolo pulimu.’ nimbu yunge ungumu taka lepo pilipulie, kanopa kerí kanolemo uluma naa tepo molamili.

## 13

<sup>1</sup> ₁Tenge kinie Pulu Yemone kanopa peanga kanomba ungu mare kamu niembo. Ene Kirasinge yamboma ‘Nanga angenupili’ ningu konopu anju yando monjiku molai. ₁Konopu monjikulie i siku teangi.₁

<sup>2</sup> Kolea suluna ₁Kirasinge, yambo ponenge mare onge kinie munduku naa kelko enenga ulkendo mengo pangí. Ou yambo marene aku teringi kinie ‘We yambo mare nokokomolo.’

konopu leringi nakolo mulu koleana angelloma nokoringi\* kene ,aku siku teai,.

<sup>3</sup> Kirasinge yambo ka ulkena pelemelema ene we molemele yambomane 'Olio ene kinie pea ka ulkena pelemelkanje 'Olionga yambomane olio ongo nokangi.' nimbu pilimelka.' ningu pilkulie kanu ka ulkena pelemele yamboma kondo kolko nokai. Enenga opa toumane enenga yambo mare teko kenjingi kinie ene we molemelemanane 'Opa toumane olio aku siku teko kenjilimelka mele ene teko kenjikimili.' ningu pilku kondo kolko nokai.

<sup>4</sup> Amboma ye puku yema ambo liku telemele mele 'akumu paa peanga' ningu pilku molangi. Ambo yema eneno teluna peangi. Ambo ye pulime kinie ye ambo lilime kinie wa ulu pulu keru telemelema Pulu Yemone apurupe mindili lipe simbe kene ambo yetolo eneno teluna peangi.

<sup>5-6</sup> Kou monema kanoko yama naa mengo molai. Pulu Yemone nimbendo:  
"Nane ene paa mundupu naa kelepo anju paa naa pumbu.

'Ene eneno molangi naa nokombo.' paa naa nimbú.".\*

nirimu. Aku nirimumunge pilipulie

"Ailimu nanga lipe taponjilimu;

na mini wale naa mundumbu.

Yambo tene na kinie

nambolka ulu keru te manda tembaye?".\*\*

nimbu manda tondolo mundupu pilimolo kene mele nosilimelema 'Manda nosilimolo.' ningu pilku molai.

7 Ene ‚Kirasinge yamboma,‘ ene ou noko-ringi tapu yemane ou pulu pulu Pulu Yemonga ungu ningu siringi yema pilku molai. Kanu yema molkolie koloringi mele pilkulie ‚Pulu Yemone lipe yando mundurumu ye nomi Kirasimu yu,‘ sike. ‚Yuni sike olio lipe taponjilimo taponjimbe.‘ ningu tondolo munduku pilku moloringi mele\* pilkulie aku siku manda lelko teko molangi.

8 Yesusi Kirasi ou molorumu mele kinié kepe aku sipe we molemo, pe alieli alowa naa tepa aku sipe molopa mindi pumbe kanumu.\*

9 Akumunge ‚enenga ou tapu yemane mane siringi mele munduku naa kelkolie ningimuni, ungu mane ouma pilku Pulu Yemo popo tolemele yemane, kolo toko ungu lupe lupe ningu mane silimelema naa piliengi! ‚Aku ungumane olio Kirasinge sike yamboma molomolo aulkemo ‚munduku keleangi.‘ nimbé.‘ ningu pilku aku unguma komu naa tenjiku molai. Pulu Yemone olio we kondo kolemo ulumuni olionga konopuma tepa tondolo mundunjilimo kinie papu. ‚Ye marene ungu mane sikulie, ‚Ene ‚Pulu Yemo kinie kapola kapola molamili.‘ ningu langi i sipe i sipema nangi.‘ nilimele ungu manema pilkulie langi ‚Nangi.‘ nilimelema nongi liemo aku tenge ulumuni enenga konopuma tepa tondolo naa mundunjimbe. Aku ungu manema pilkulie aku langime nolemele yamboma aku langimene uluri naa telemo.\*

10 Ou Pulu Yemone ‚na popo toko sele ulkena suku kongi melema kalai.‘ nirimu mele pilkulie Pulu Yemo popo toko kongi melema kalko sil-



imele yambomane olio ıKirasinge yamboma, ne Pulu Yemo popo tolemolo mele tapu toko manda pea naa tenge.\*

11 ıOu sele ulkena teringi mele pilipelie aku sipe mele tembando, Pulu Yemo popo tonjili ye aili olandopamone\* ‘Pulu Yemone yambomanga ulu pulu kerime kanopa siye kolopili.’ nimbe kongi tenga mememo kolopa memba suluminia paa kake teline suku memba pupe ıPulu Yemo, sirimu, nakolo aku kongimu yambo molko peringi koleamo munduku kelko ulsu mengo puku ‘Tepene nopili.’ ningu kalingi.

12 Ou aku siku teringimunge Yesusi kepe ‘yunge mememone Pulu Yemone yamboma kanopa ‘kake telime’ nimbe kanopili.’ nimbe yambo molko peringi kolea ailimunge pala\* ulsukundu mindili norumu.\*\*

13 Akumunge Yesusi pala ulsukundu molemona lombili ulsu pupu ‘yu teko pipili konjiringi\* mele olio kepe yu pea teko pipili konjengi tapu topo molamili.’ nimbu akuna pamili.\*\*

14 Ya mana olionga kolea lepa mindi pumbe kolea te naa lemo, kolea te pe wendo ombámo\* nokopo molemolo akumunge ıPulu Yemo popo toli ulu ouma mundupu kelepo ‘teko pipili konjıngi liemo uluri molo.’ nimbu Yesusi lombili pamili,.

15 ‘Yesusi ıolionga kolo wangopa kolonjirimu; yuni yuyu olionga Pulu Yemo popo tonjipe sirimu, kene’ pilipu, ‘Aku sipe terimumunge Pulu Yemo molemona manda pumulú.’ nimbu pilipulie ‘Pulu Yemo popo topo melte kalopo siemili.’ nimbu\* Pulu Yemo alieli kapi nimbu

molamili. ‘Pulu Yemo paa aili olandopamo.’  
nimbu yu popo tomolondo olionga keremane yu  
alieli kapi niemili.

16 ‘Pulu Yemo popo tamili.’ ningulie i  
siku mele teangila: ‘Yamboma tepo konjemili.’  
ningu liku taponjiku, mele molo tomba yam-  
boma enenga mele mare moke teko siengi. Pulu  
Yemo popo tongendo aku siku telemele uluma  
yuni kanopa peanga kanopa konopu silimo kene  
komu naa siku aku siku teko molai.

17 Enenga nokoli yemane\* “Teai.” nilimele  
mele pilku liku teko taka lelko molayo. Kanu  
yemane ‘pe Pulu Yemo kongono telemolo mele  
nimbu simulú kinie “Teko konjiringi.” nip-  
ili.’ ningu pilku ‘ene molko konjengi.’ ningu  
nokolemele. Akumunge enenga ningí unguma  
pilku liku, ‘Olio aku sipu kongono temolo kinie  
olionga nokoli yema konopu siku konopu um-  
buni naa pepili olio nokangi.’ ningu enene  
“Teai.” ningí mele teko molai. Enene enenga  
nokoli yemanga unguma pilku liku naa teko  
anju púngi liemo nokoli yema konopuna umbuni  
te pemba\*\* aku ulumuni ene manda naa lipe  
taponjimbe kene aku teangi.

18 Pulu Yemone olio lipe taponjipili mawa  
tenjengi. Olio konopuni pilipulie ‘ulu te tepo  
kenjilimolo.’ nimbu naa pilipu, ‘Olio alieli sumbi  
sipu andamili.’ nimbu pilipu molemolomonga  
‘enene aku siku Pulu Yemo olionga mawa ten-  
jingí kinie pilimbe.’

19 Ungu te pea ene tondolo mundupu mawa  
tekerola. Pulu Yemo kinie ungu ningulie na ene  
molemelena paa nondopo kelepo wambo kene

‘Pulu Yemone na lipe taponjipili.’ ningu mawa tenjengila.

<sup>20-21</sup> 1Kinié Pulu Yemo kinie enenga mawa tenjembo:; ‘Konopu pe nipili taka lelko molangi.’ nilimo Pulu Yemone enene tenge kinie kanopa peanga kanomba uluma manda tenge tondolo paa peangama sipili. Yu olionga Aili Yesusi kolumu kinie Pulu Yemone yunge yamboma kinie ungu konde nimbe panjipe mi lerimu ungumu yunge mememone ‘kamu pepa mindi pupili.’ nirimu kinie ‘kelepa ola molopili.’ nirimu Pulu Yemo. Yesusi Kirasini olio lipe taponjilimo kene Pulu Yemo yu kanopa peanga kanomba uluma Pulu Yemo yuni olio kinie tepili. Olionga Aili Yesusi yu kongi sipisipimenga tapu ye enge nilimu.\* Yu alieli kapi nimbu imbi ambolopo ola linjemili. Aku sipu temolo kinie papu.

<sup>22</sup> Angokeme, ‘nane ene i pepá topo sikiru akumu ungu wallo kolte mindi tokoro kene akuna sukundu ‘Teai.’ nikiru mele siye naa tepili mimi siku pilku molai.’ nimbu tondolo mundupu mawa tekero.

<sup>23</sup> Nane ‘ene piliengi!’ nimbu nikiru: Olionga angenu\* Timoti kinié ka ulkena we naa pelemo, yu ulsu munduringi. Yu na moliona nondopa omu liemo olto pea ene molemelena ombolo.

<sup>24</sup> Ene nokolemele yema kinie Pulu Yemonga yamboma pali kinie “Manda molemeleye?” ninjengi. Kolea Italli yambo ya 1molkorona oringi, molemelemanane ene Ipuru yambo Kirasinge molemelema “Manda molemeleye?” nikimilila.

<sup>25</sup> 1Pulu Yemone, ene pali we kondo kolopa molopili molangi.

„Aku pea nikiru.”

**PULU YEMONGA UNGU KONDEMO**  
**The New Testament in the No Penge Dialect of the**  
**Umbu-Ungu Language of Papua New Guinea**  
**Nupela Testamen long tokples Umbu-Ungu No Penge**  
**long Niugini**

copyright © 1995 Wycliffe Bible Translators, Inc.

Language: Umbu-Ungu No Penge (Umbu-Ungu)

Dialect: No Penge

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 28 Dec 2024 from source files dated 31 Aug 2023

d72fc3f0-db59-5dba-99c3-8bd2a84ed896